

東  
華  
續  
錄

光緒八十二

臣朱壽朋敬編

臣潘鴻鼎恭校

夏四月己未徐用儀因病奏請開缺不允予假兩月調理○諭本年三月二十三日朕初詣先農壇舉行耕藉禮土膏滋潤天氣清和樂部順天府派出執事各員預備甚為整齊悼親王侍郎師曾署府尹薛福辰府丞何桂芳俱著加恩賞加一級帶領樂工官員外郎廣英廣森文廉莊山駟騎校明錫善俱用官連瑞恆泰御前隨行官大興縣知縣龔陰培宛平縣知縣王本培播種官副指揮陳禮森白荃王瑞明李金辛卿炳奎吏目邵虎文品達辰孫德成嚴慶琳邱廷榮典史田起瀛謝順保看耕牛官治中党光泰正指揮張吉貞蔣春齡何振彩看綠亭官正指揮蘇喬年經歷王曾彥照磨石官泰司穰王沃甫看備用耕牛官通判周之辰正指揮姚山麟預備禾種供用官四員慶成宮預備中和樂供用官七員預備丹陛樂供用官五員預備導引樂供用官四員俱著賞加紀錄一次署史共一百七十五名耆老十九名農夫六十名俱著賞給一兩重銀牌一箇由廣儲司給發○庚申以周德潤署工部右侍郎○岑毓英奏滇省營伍宜認真整頓以期造就人才查營制弓箭與鎗礮並重雖射以觀德固不可廢而鎗礮尤為制勝之要

臣擬除弓箭靶式照舊外其鎗礮所打之靶製爲橫一尺以三百步爲準自副將以下至外委以上無論候補實缺凡在省各員并由臣每月親校一次外標亦應輪流調考如能鎗法優嫻命中有準者酌量奏請補委題升或能操練兵丁精熟確有把握者亦請超升倘怠惰自安鎗法拙劣亦即分別參革並令隨時操演兵丁資成各營送考亦由臣親試明定賞罰嚴加勸懲於營伍不無裨益得旨允行○辛酉予故前任綏遠城將軍福興祭葬○俞徐會灃授溥倫讀蔭蔭蔭蔭○岑毓英等奏雲南電線工程告竣後經貴州撫臣潘蔚奏請黔省亦設電報即由畢節添接一線以達省垣俾通京外聲惠已蒙諭旨允准在案嗣因該局委員飭匠勘路而大定府黔西州居民均有阻工之事即經臣札飭貴西道李肇錫督飭各屬妥爲開導毋任滋生事端茲據雲南電報總局委員前廣西補用知府李必昌稟本年四月初二日接貴州畢節縣分局委員李綺章電稱三月二十三日該局突有居民多人擁入毀打搶擄銀物而去是夜各路電桿被其砍壞不少等情前來臣查貴州畢節縣電報分局已設多月本屬相安該縣居民究竟因何起衅突然聚眾毀搶該地方文武各官何以事前皆無覺察臨時又不能彈壓排解亟宜委員查明辦理以儆刁風查有記名提督吳永安從前隨臣出師貴州頗有聲威局員李必昌辦事精細能幹臣現已飭令會同署威寧鎮總兵陶茂林馳赴畢節縣會商貴西道李肇錫妥爲辦理查拏起意滋事

首要各犯解由貴州臬司審辦一面確查該處民人因何起衅滋事緣由據實稟報嚴辦其被砍壞電桿  
卽由委員李必昌查明飭匠修整俾得通報得 旨覽奏均悉卽著飭令吳永安等將首要各犯務獲懲  
辦該處居民並著妥爲開導以靖地方○裴蔭森奏准戶部咨開議擬船政員紳薪水懇准照數支銷摺  
內聲稱嗣後該廠限用員紳名數亦卽按照單開之數作爲定額不得率行添派等語於光緒十二年五  
月十九日具奏奉 旨依議欽此欽遵移咨前來臣謹查船政各廠所額設員紳經歷任各大臣斟酌盡  
善並無冗員間遇廠工稍鬆就中懸曠數員或以一廠兼兩廠之事或以一人兼二人之責誠以 國家  
帑項絲毫必惜有可撙節之處無不力求撙節辰下廠工尙未繁興所有久經懸曠廠員自應暫照部章  
不復添派惟臣原奏單內後學堂兼管輪學堂額設四員懸曠二員此二員者非久懸未補之缺因其時  
考核裁撤卽中梁修年訓導梁鳳翔所遺之員缺也學堂爲人才所從出實船政根本該兩堂學生一百  
二十有八人管理者於支放贍養飯食之外凡課讀學業稽查出入所以防閑誘掖於無形者以四員之  
耳目精神尙恐其日不暇給若更誤會部章以爲懸曠二員不復派補該兩堂僅設二員惜微費以誤要  
圖臣雖至愚斷不敢出此故於梁修年等撤差後以遴選難乎其入暫派他廠員紳兼攝以承其乏又以  
廠員兼攝照料難周於去年十月間添派刑部主事曾福謙月支薪水銀四十兩十一月間添派候選直

隸州知州劉宗駿月支薪水銀四十兩會同管理始臻妥協臣因公起見斷不敢廢費以濫用冗員惟有仰懇 天恩俯念該廠員缺本非懸曠不在部議不得添派之列准予派補以肩重任下戶部議奏○癸亥以任祖文爲湖南永州鎮總兵○欽奉 慈禧端佑康頤昭豫莊誠皇太后懿旨近日京城銀價易錢易票任意低昂而物價不減兵民受累據戶部奏稱由民間竊議制錢一出大錢將廢各鋪所開錢票恐將來虧折紛紛收回遂致錢票現錢價值懸殊等語規復制錢仍准搭用當十大錢本年正月諭旨甚明何至民間仍未曉喻總由奸商從中把持牟利蠱惑愚民狡僧情形實堪痛恨現在戶部擬定章程將來通用制錢之時每當十大錢准折抵制錢三文官民購買物件及各行商賈均照此出入不准稍有參差其捐項稅務亦照此折抵數目搭成交收庶大錢制錢相輔而行不致偏廢所籌各節均係爲便民起見著照所議辦理該部商應各安業無庸折折所有銀價易錢易票俱當折照市價統歸一律不得任意漲落致累閭閻經此次宣諭後倘再有奸商播弄取巧紊亂錢法一經查出卽著該地方官按律懲辦決不寬貸將此通諭知之○甲子子故烏魯木齊提督金運昌照軍營立功後病故例從優議卹○諭都察院奏河南民人李延華以洛陽縣漕米違例浮收兼將伊兄李延榮濫刑斃命等詞赴該衙門呈訴該民人旋卽在押病故並於屍身檢出告示糧單各件一併鈔錄呈覽等語案關苛徵病民酷刑斃命虛實均應

澈底根究著邊寶泉督同臬司親提人證卷宗秉公研訊務得確情定擬具奏毋稍瞻徇○諭剛毅奏州縣虧欠交代銀米逾限未繳請旨革職查抄等語山西已故嵐縣知縣張啟蘊計嵐州知州李德延署懷仁縣知縣唐鈺和順縣知縣左兆熊虧短各任內止維各款銀米爲數甚鉅前經勒限追繳迄今尙未完辦實屬玩延張啟蘊李德延唐鈺左兆熊均著卽行革職任所寓所資財嚴密查抄並提集書差嚴訊是便是擲按律懲辦其各該故員旗籍家產卽著止藍旗漢軍都統順天府府尹山東巡撫直隸總督一律查抄備抵以重庫款○曾國荃奏前因籌辦江海防務擬就吳淞江陰兩處建築礮臺曾經奏明在案此項工程經臣派委統領慶軍狼山鎮總兵曹德慶統領淮軍蘇松鎮總兵張景春統領湘軍藩司劉連捷等各派營勇分投工作並雇用西人來華監築山礮防局總司其事茲據該局司道江甯布政使許振禕江蘇候補道湯壽銘等詳稱修築該項極新洋式大礮明臺各安設八百磅子大礮四尊並各於大礮旁佐以哈吃克司礮四尊工程浩大用款繁多南洋從前未經造過所需中外物料均須隨時備具不能如尋常臺工用項可以預先估定確數前經聲明吳淞江陰兩處礮臺工程約須銀十萬兩有奇雖係指每座十萬兩而言然亦不過預先約計之詞惟吳淞與江陰地勢雖有不同而礮臺做法之精用料之多施工之難情形則一查吳淞地臨海濱其勢低窪土性鬆浮非處處排釘巨樁堆砌土石層累而上根脚

難期堅固且必需速赴定海取土運石尤屬多費所需中外鐵石土木筏繩各物料無一不備尤以鐵水泥及木料爲大宗此外築造兵房大小子藥庫房所需器具之多費用之鉅均非尋常礮臺可比至江陰係依山築臺最爲得勢而石堅如鐵開山平基艱難萬狀須先用火藥將堅石轟動後用鐵器逐層鑿開因山石之難開而所需器具倍增所費亦因之倍鉅經各統領會同西人相度江陰形勢四門大礮臺必須分築兩處方足以扼險要而制敵艦一於小角山由淮軍承築一於黃山由湘軍承築兩臺相距約二里餘工作既分費用亦倍他如另築起礮碼頭所用椿木極多而礮身每尊重七萬餘斤山路自下牽挽而上沿途夾釘椿木以束地勢使免壓陷復掛繩索以紆人力所用洋木不少又如築成之子藥庫房前經奏明由出使大臣曾紀澤順途勘驗曾紀澤以子藥房不宜太近礮臺恐防敵人轟擊用將已築成之子藥房改爲兵房另於山後改築兩臺子藥庫房多一轉折卽多一用項所須物料或與吳淞相仿或且過之現在兩處工程約已十得八九計已用經費三十餘萬兩有奇此後約仍需三萬餘兩乃能蒧事加以工竣後各軍工作勇丁從事兩年備極艱苦尚須酌給賞號合計全臺告成約實需銀三十五六萬兩從前本擬吳淞江陰各築礮臺一座共只兩座今則江陰分築礮臺兩座共成三座而用費較原擬每座約需十萬兩有奇尙不大相懸速詳請奏咨立案前來臣覆核無異除催令趕緊趕辦完工以重防務並

分咨戶部工部暨咨呈總理衙門海軍衙門查照外所有吳淞江陰兩處增築洋式大礮臺需用經費銀數緣由理合恭摺具陳下所司知之○乙丑諭軍機大臣等各省提鎮大員均有專閫之責必須才略素優方足以資整頓邇來軍務較平尤應安不忘危物色將材用備任使著各直省督撫於軍營著績人員內無論實缺候補各就其人之才具或長於陸路或熟於水師出具切實考語分別保奏其曾經引見發往各省差委之提鎮各員本欲令其練習營務以備緩急並著隨時留心察看如有才識出眾之員一併奏保聽候簡擢○諭昨日翰林院引見滿洲日講起居注官各員奏對履歷清語生疎者甚多並有草率者實屬不成事體嗣後各衙門帶領引見人員務當倍加謹慎滿洲各員口奏清語尤應於平日加意學習如再錯誤失檢定必予以懲處懍之○李鴻章奏臣於三月初五日在差次接據永定河道塔奇魁稟稱該河近年大溜皆由南八上汛大范壩口一帶向東北至韓家樹會清河入海南八下汛堤埝本係平工向不備儲椿料今年凌汛因舊河身下口淤高恐致改流曾於該汛購料防守乃冰泮後上游凌水源源而來迭次增漲勢甚洶湧河流忽改南趨逼刷該汛堤根連日竭力設法搶護乃二月二十二日夜狂風大作水益擡高排空而下人力難施從南八下汛十三號漫過堤頂該堤本因清河之水北泛業被浸潤遂刷成漫口二十餘丈並有旱口數處查此漫口處所卽係道光十年以前永定河下口現仍會清河



入海口門距清河八九里漫水經過地面係大窪荒港並無村莊舊河身下口既已高仰挑挖不易堵決  
培堤費亦較輕擬就漫口改爲下口請派員勘議等情當卽飭派天津道胡燏棻候補道張紹華候補知  
府桂本誠馳往會同該河道詳細察看妥議臣差竣回津經過該處復親自察看旋據該道等稟復請俟  
秋後再行酌度前來伏查永定下游近由韓家樹左右會入清河勢非暢順緣河面狹窄大汛渾水力猛  
清不敵渾遂受倒灌之害汛後旋亦刷通現在漫口在韓家樹以上十餘里口門以南清河以北及東西  
一帶本係汪兒淀楊芬港窪地爲嘉慶二十三年以後道光十年以前永定河下口渾水蕩漾之區清河  
之水已於上年北泛數里今與渾水連合東趨入海其勢頗暢汪兒淀楊芬港等處寬廣數十里非韓家  
樹左右河道狹窄可比尙可散水勻沙諸河不致連成淤墊恭讀乾隆十九年 高宗純皇帝上諭方觀  
成奏永定河下汛堤堰漫水一摺漫口既屬駁尾又外但空闊處所若無淤墊之患似可聽其合流使下  
口益暢等因欽此誠以治河必極其利害輕重因地制宜尾閘堤堰內外本可聽其行流藉資蕩漾下口  
暢則上游亦得速消庶免到處衝突今漫口既在尾閘又係昔年經行之地泥濘平衍尙堪容受一時無  
害全局且距舊日清渾合流之韓家樹僅十餘里卽間有淤滯亦與往歲情事相同疏濬尙易爲力現值  
庫儲支絀鉅費難籌自應如該道等所議緩俟秋後察看情形能否就此改作下口清渾並行再行統籌

詳酌奏辦以昭穩妥而免虛糜清河之南卽子牙河向有格淀堤爲清河子牙界限已飭天津道將格淀堤修築完固以防南溢並飭挖河機器船傍堤疏挖就土堆堤多爲之備具永定河南八下汛十三號以上堤段卑薄仍嚴飭該河道趕緊盤做裹頭加培高厚無使續塌並築挑水大壩以資捍護得 旨著照所請俟秋後察看情形奏明辦理仍將格淀堤堅築以防南溢○李鴻章奏臣前奏派員赴朝鮮辦理商務章程內開總辦分辦委員照出使外洋之例三年期滿山北洋大臣考核擇勞績較著者奏請獎敘經總理各國事務衙門議覆應如所擬辦理奉 旨允准行知在案茲據駐紮朝鮮總理交涉通商事宜三品銜升用道補用知府袁世凱稟稱朝鮮通商各口均係創始隨帶各員如唐紹儀吳仲賢幫同稅務司開設海關艱苦經營又在朝鮮外署教授諸生西學有裨時事陳寶秋張燮堯先後在漢城釜山辦理商務並繙譯事件均極勤慎從無貽誤各員薪水本不爲優又居朝鮮寒苦之地曾經變亂諸事棘手均能竭力從公始終不懈現在唐紹儀等自到差後均扣足三年期滿著有微勞自應照章程請獎所有候選縣丞唐紹儀擬請免選縣丞以知縣不論雙單月前先選用並加同知銜候選從九吳仲賢陳寶秋均擬請免選從九以縣丞不論雙單月前先選用並加六品銜附貢生張燮堯擬請以縣丞不論雙單月過缺前先選用並加六品銜等情前來 臣覆核並無冒濫仰懇 天恩俯准照擬給獎以昭激勸得 旨唐紹

儀等均著照所請獎勵○內寅裴陰森奏查出洋藝成學生或回華供差或留洋監製皆在奏定考核員紳之後未曾咨部立案者計有陳林璋黃庭生迴瀾王福昌鄭誠李芳榮六員陳林璋於六年六月回華曾充閩廠製船副監工旋調赴浙江山東兩省辦理機器局事務十二年五月由山東撫臣咨送回工會派充會辦製船監工月給薪水銀五十兩黃庭於十二年二月回華派充前學堂洋文教習月給薪水銀四十兩王迴瀾於十二年二月回華曾充前學堂洋文教習旋經調赴臺灣遣用十二月由臺回工派辦繙譯事務月給薪水銀三十六兩王福昌於十一年十一月回華調赴廣東遣用十二年六月咨回工次派辦繙譯事務月給薪水銀三十六兩鄭誠於七年八月派隨駐美使臣鄭藻如在洋辦理繙譯十二年三月回華仍派辦繙譯事務月給薪水銀三十六兩李芳榮出洋藝成後尚未回華經留洋辦理參贊官署繙譯十二年七月起復派在洋監造鋼甲月給薪水銀七十二兩津貼公費英金三十磅該學生等均屬國家造就成材足資器使自未便置之閒散葉前功經臣前後委派差使合無仰懇 天恩准予飭部立案下部知之○丁卯予故福建陸路提督唐定奎照提督軍營病故例從優議卹准於本籍及立功省分建祠職功事蹟交國史館立傳○曾國荃奏臣於光緒十一年八月十七日奏獎洋務出力各員一摺並聲明蘇松太道等所送原冊人數過多業經臣將出力稍次者大加核減等情奉 旨劉佐禹等均

著照所請獎勵等因欽此當即恭錄轉行欽遵去後旋准部咨以光緒九年六月奏定嚴核保舉章程內開各關洋稅等項事務均屬應辦之件不准保獎請 旨更正在案復經臣於光緒十二年八月十四日奏明出力各員係辦理交涉重大事件與辦理關務稅務情形迥別懇 恩俯准仍遵前 旨給獎奉 旨著照所請等因欽此復准部咨以各關辦理通商洋務即係經徵關稅光緒七年劉坤一奏保各員摺內聲稱徵收交涉事件均能按約妥辦近年稅數較有起色等語是各該員辦理關稅毫無疑義至此該督摺內亦稱合上海鎮江等處各關局列保試思若非徵收洋稅何得有關查與前案聲敘不符仍請 旨更正在案臣查劉坤一前奏係在光緒七年其時稅務洋務均准列保自應按照事理兼二者以立言故有徵收交涉事件均能按約妥辦等語而其意仍注重洋務及稅務是以原奏復有正當邊海籌防之際尤能出以鎮定備極精詳凡過洋官商辦公務無不開誠布公和衷妥議地方綏靖華洋相安各等語其為承辦洋務固早在 聖明洞鑒之中臣此次奏報摺內亦經聲明本屆三年期內適時事方棘上海鎮江係屬切近之區且均係錢賦之薮各該員會同在防水陸各軍實力巡查多方安撫而偵探之苦奔走之勤聯絡之難操縱之善用能使各國咸帖然相安不致另生波折尤屬有裨大局弭患無形益非往屆勞績可比伏念臣辦理南洋通商大臣事務衙門同一通商字樣並非專管稅務即此次部臣片奏

亦云嗣後如實係隨同南北洋大臣專辦洋務人員准其聲明列獎是部臣亦知南洋實有隨辦洋務之員特疑臣將辦理稅務者濫列保臣受國厚恩委辦交涉各件事體至煩責任至重報稱至難若顛倒是非合應保之人員而保所不應保微論無以仰副朝廷亦非激勵屬員之道臣雖至愚何敢出此在劉坤一於稅務准保之時則兼及洋務在微臣於接准部章以後則專保洋務自問無冒濫亦並無聲敘不符如謂若非稅務何得有關實因經費有常礙難處處設局因之連類而及因地制宜將經辦洋務之員分隸各關以實耳目而聯指臂其中專辦洋務者有之兼辦洋務者亦有之要在核其勞績確係洋務出力卽專以洋務保獎惟因未准部章致未將各員勞績分別聲敘遂啟部臣之疑再此次部臣奏准嗣後出力人員三年請獎自當遵照辦理而自光緒七年以後迄今已閱六年在前者既准列保在後者復准列保惟此六年中出力之員獨令向隅似非事理之平茲謹將所保各員實在勞績聲敘清單並將出力稍次先經核減之三十六員一併另繕清單恭呈御覽下部議奏○曾國荃奏臣前准戶部咨江蘇省操用軍火器械均應在機器各局撥用不准再向外洋購買卽有必須購買之件亦應遵照奏定章程先行咨報戶部暨海軍衙門俟核准請旨後該省再與洋人定議一片奉旨依議欽此等因轉飭遵照在案茲據防營支應局江甯布政使許振禱江蘇候補道吳炳祥等詳稱水陸各營前購洋鎗歷由

支應局購解備撥茲查留防項下儲存前膛法國兵鎗為數無多而各營前領洋鎗操用年久多有損壞現在紛紛換領不敷撥給竊查金陵機器局製造礮位礮彈向無造鎗機器無從仿造上海機器局現係專造林明敦後膛洋鎗其前膛鎗件停造已久如須重造仍須重置捲鎗機器及鑪座各件工程頗鉅則核算造價計當昂於現購之數竊以各營平時操演多用前膛洋鎗亦間操後膛以習手法係為節省藥彈愛惜鎗枝起見現在存鎗無多若由局另製需費較多自應擇便而從以重款項探悉上海洋行訂購價值尚廉擬購辦前膛洋鎗二萬枝其各防營現用之馬梯呢黎意毛瑟等項後膛洋鎗該兩局均先未仿造擬一併購辦一萬枝配備藥彈一千萬顆以資練習此項價銀一時籌措匪易當分年陸續購辦由留防軍需項下撥給造報詳請奏咨前來臣覆核無異合無仰懇 天恩俯念洋鎗為操防要件現在存數不敷支發若由局製造需費較鉅准其照數購買以利軍械而固海防下所司知之○已已 上詣大高殿祈雨○李鴻章奏醇親王等會議整頓錢法一摺欽奉本年正月二十七日 諭旨規復制錢必應廣鑄鼓鑄著李鴻章先行購置機器一分就天津機器局趕緊鼓鑄運京備用嗣後每錢一文均以重一錢為率京局及各省一律照辦等因欽此遵飭天津機器局前福建藩司沈保靖候補道潘駿德會同天津道海關道詳細訪詢外洋鑄錢機器樣件價目據查各洋行開呈清單器具多寡不一價目懸殊每

分自三萬餘兩至七萬餘兩不等機器造法本與中國模鑄不同其自鎔銅捲片以至成胚鑿孔印字光  
胚挨次相連又非多建廠座不敷分設事體本極繁重工本必多虧折惟既欽奉 諭旨飭先購機器一  
分試鑄亟應設法妥籌該局前曾將中國制錢寄至英國格林活錢廠詢購機器據該廠開呈需英銀八  
千餘磅因飭往復討論並就局中廠屋器具歸併凡可通融勻用者概無庸購買俾從節省即向格林活  
鐵廠擇要訂購機器議明賄價減去三千磅實需英銀五千三百八十三磅合中國銀二萬二千餘兩據  
洋廠云夏秋日永每日造十點鐘可成制錢二十四萬枚冬春暑短造八點鐘究竟每日能造若干須俟  
器到由局核實試造方能有準當已電致該廠迅速配製先付半價二千六百九十一磅十喜林又水脚  
保險約五百五十磅共合中國銀一萬四千餘兩飭由該局司道暫行挪款墊付俟機器運到連後半價  
核明若干一併奏請撥給惟此項機器屢次電商至速須八月間造成由英國裝船起運計運到天津已  
在十月以後又須按照機器式樣修蓋廠屋安軸置器約至來春方可開鑄誠恐緩不濟急有誤京中要  
需自應先用土法鼓鑄並行不悖查直隸省城本有寶直局仿鑄制錢從前按月由部發給銅鉛由藩庫  
開支經費軍興後久已停鑄臣於上年九月間飭天津道胡燏棻即在津郡創辦名為寶津局業據挪借  
款項購買外洋銅鉛建廠置器募匠開爐自冬徂春考核造法錢樣工本漸已就緒其鑄出新錢共成八

千餘串較福建所鑄者加重五釐每文計重九分頗稱堅潔商民皆甚樂用臣於二月間入都時已將機器局用洋法試造錢樣及土法錢樣二種面交醇親王轉呈 慈覽仰蒙 嘉許臣並將錢樣面交戶部錢法堂查閱現飭天津機器局一體暫照土法採購銅鉛就局中墮地建廠開爐與天津道分投承辦俾可多鑄早日濟用均遵 諭旨每錢一文以重一錢為率勿稍參差據沈葆楨胡燏棻等詳稱該局道擬各設五爐共合十爐每爐一座計置備廠屋爐具約需銀二百二十兩又該局該道每月各約需員役薪工紙張雜費銀二百兩再三考校銅鉛火耗須及二成每鑄制錢一千文計用銅鉛七斤十三兩以銅五成四鉛四成六配搭所需銅鉛柴炭價及各項器具匠夫工食約合銀七錢六分九釐七毫一絲其建廠設爐及員役薪工等費在外臣復督同該司道逐細核算刻值開辦之始事事皆係創置且錢料加重工本勢難減少計虧折尚不甚多採購銅鉛係按目前時價儘日後增減隨時核報現飭天津道機器局司道趕緊分辦仍力求撙節自本年閏四月起計一年內應令各認造新制錢五萬串共十萬串專備運京之用至於天津市面行用制錢常有缺乏之時除天津道已造者業經發給外另由該道等籌款酌量另鑄藩司松椿亦經籌款購買銅鉛在保定建廠置器募匠開爐以濟省城商民之用仍各於發商時收回成本轉輸周轉隨時另行核實開報不與運京之錢工本相混伏查福建鼓鑄連京制錢已由戶部查照



醇親王等原奏撥給工本銀二十萬兩卽在該省本年應解地丁京餉內截留抵用其湖北等省運京制錢亦均於京餉內劃抵誠以規復京師制錢事關重要必須款項有著乃能迅速集成直隸欽奉 諭旨鑄錢運京事同一律且係瘠苦災歉之區實在無款可籌所有責成天津道機器局先照土法共認造制錢十萬串係專備運京之用約需銅鉛各項工本銀七萬六千九百餘兩連建廠設爐及每月員役薪工等費擬懇 天恩俯准撥給銀八萬兩卽在本年長蘆鹽課應解京餉內就近截留如蒙 俞允仰祈 特旨飭撥以濟要需事竣據該咨部核銷至外洋機器鑄錢銅多鉛少質樣最精虧折亦較重每制錢一千實需銅鉛各項工本若干應俟機器運到開爐後核明確數再行專案奏辦得 旨如所請行○庚午兩○召裕祿入覲以奎斌兼署湖廣總督○辛未又兩○癸酉 上詣 大高殿報謝○甲戌以文治爲內閣學士○乙亥命恩承薛允升往廣西查辦事件○丙子常壽大祀 天於 闕丘 上親詣行禮○欽奉 慈禧端佑康頤昭豫莊誠皇太后懿旨尙昌懋著交總理海軍事務衙門王大臣差遣委用○調尙昌懋爲正紅旗漢軍副都統○丁丑諭御史胡俊章奏各省題咨事件遲延請飭立限辦理一摺著該部議奏○諭李鴻章奏特參交代虧短各員請旨拿問監追查抄開單呈覽一摺江西已革知縣戴雲漢等前在各本任署任內虧短交代銀兩爲數甚鉅迭經勒限嚴催抗不完解實屬玩延已革前署爲年縣

知縣戴雲漢前代理都昌縣知縣王家棟前代理瑞金縣知縣葉滋鼎前署餘干縣知縣孫瀨前署鉛山縣知縣蕭國瑞前任義寧州知州費鴻甄前任安仁縣知縣鍾烈前署新喻縣知縣許煥雲前代理進賢縣知縣李文同均著拿問並提已故前任餘干縣知縣蔡世鑾建昌縣知縣邱文光前署永豐縣知縣彭際盛前任豐城縣知縣項珂前署建昌縣知縣蔡厚楨前署永寧縣知縣柯榮前署永豐縣知縣楊家壽前署瑞金縣知縣孫長慶前署永豐縣知縣陳庚銓前署安福縣知縣雙貴前署信豐縣知縣邵椿齡前署瑞昌縣知縣周振銳前署宜春縣知縣程培榮前任宜春縣知縣韓潤等各該經手丁胥人等嚴訊是侵是挪分別監追按律懲辦並查各該員任所寓所資財嚴密查封其各該員旗籍家產卽著鎮藍旗漢軍都統順天府尹閩浙總督浙江安徽湖北河南山東廣東廣西雲南各巡撫一律查封備抵以重庫款○辛巳方汝紹奏京師人煙稠密街道偏窄每遇大雨時行全仗溝洫溝洫流通始免壅遏浸淫之患朝廷特設溝渠河道大臣每歲不惜重帑修治防患未然慮深且遠迨後該部以歲修鉅款不貲奏改爲歲以一萬二千金按年分段興修於節省之中仍有疏治之意屆時恭請 欽派大臣監修責成綦重也上年係大臣四員分段興修迄今甫及一年不但溝水淤塞如故抑且變本加厲於從前未經蓄水之區亦形淤積已將化石橋溝牆浸塌丈餘若不責令賠修誠恐日久必費大工彼時修之則無款可籌不

修則爲患甚鉅就此保固限內實令分賠該商必無從藉口且淤壞之處尙屬無多此時施功亦較易爲力也惟是疏濬水道暗溝視明溝爲通塞內溝與外河相表裏去年溝壅興辦之時正外河疏通之候何以淤滯情形視前尤甚探原其故則工程之用力未能專壹耳前歲挑挖護城河工程極大仰蒙 宸斷特派張曜一軍疏治閱時九月一律暢通其所以能然者事極專也去歲承辦溝壅係分派四人四人又分派各商開木商竟有派至七八家之多者人多則各思取巧而又無人督率一切聽商人自爲其中剝削層層弊端種種此所以四人之分修不若張曜一人之獨任而外河已收功內溝終無效也伏查化石橋一溝實爲全溝之關鍵南北長約在三百丈外受城西北面諸水又合正陽門以西宣武門以東諸水咸匯於此每遇盛漲溝渚皆盈具有高屋建瓴之勢全賴此溝疏通一切自無壅塞橋南二丈外卽逼近水關上年承修時若能不分畛域節節疏濬先將水關內口門淤泥淘盡自南而北再將化石橋水口疏通揆之情事並非人力難施無如事權既紛人懷觀望各商等又恃無稽查明偷暗減無怪帑項虛糜工無實際也現屆夏初時令雨水尙少若令各該商趕緊賠修既免目前浸灌之患亦免日後歛費之繁所謂事半功倍此其時矣若遷延日久設遇雨水連綿橋口既爲泥所淤水關又爲泥所滯水無宣洩不特全溝浸塌卽南面一帶城根不無可慮此又必然之勢矣 臣會詢及附近居人皆云未修以前春令時此

溝尙無蓄水之處今則全溝穢淤不堪以致溝堤爲之浸倒此尤耳目昭著難免民之煩言者也臣思當國家庫儲支絀之時不廢溝洫之政爲大臣者斷無不竭力辦公焉肯草率從事無如事權不專積習難返卽有實心任事之人亦難以力爲整頓伏請 聖斷嗣後再屆興修或專責之溝渠大臣或責之步軍統領衙門驗收之時亦專派員辦理嚴定承修驗收各官處分責成既專可杜一切觀望推諉之弊上諭御史方汝紹奏溝渠要工承修未久已形淤塞請飭賠修一摺著派承修大臣查明覆奏○癸未總理各國事務衙門奏竊光緒十三年三月二十五日軍機大臣欽奉 慈禧端佑康頤昭豫莊誠皇太后懿旨御史陳秀榮奏請將明習算學人員量予科甲出身並游歷人員准按原資參贊等官缺出准令游歷人員兼充暨濫田購用機器各摺片著該衙門會同吏部禮部妥議具奏醇親王奕譞著一併與議欽此欽遵會議仰見 聖慮周詳慎重名器造就人才之至意欽佩莫名查該御史原奏稱中外交涉以來言西學者機器船政等局同文方言等館其淵藪也出洋學童於測繪製造一切具有師法特迹其議論不免恍於先入爲主之說以事事爲必效法外洋邇者 詔各部院奏保出洋游歷竊意正途人員宜可藉此練習洋務而遷延三月保送未聞則留心西學者之難其選也臣愚以爲西法雖名目繁多皆權輿於算學洋務從算學入於泰西諸學雖不必有身兼數器之能而測算既明不難按圖以索國子監原設

算學比年各省學臣亦知試算學可否仰懇 飭下各該學政於歲科試報習算學之卷寬予錄取原卷咨送總理衙門復勘作爲算學生員屆鄉試時除頭場二場仍試四書五經文其三場照繙譯鄉試例策問五題專試算學再照官卷例另編字號於定數外酌中數名會試亦如之中式後請予京職遇有游歷員缺卽令出洋赴泰西各書院學習學成差旋專充洋務及出使等項差使如此則進非他途不爲時論所輕既非若空言洋務者之或末周知復不至如左祖泰西者之易滋流弊等語臣等維造才取士之法貴與時爲變通溯查同治五六兩年總理衙門奏爲監生准其鄉試皆充補繙譯官均經奏奉 諭旨允准原冀誘掖獎勵開以進身之途使之日起有功至鄉會試場取士向有成法難於率議更張故道光中兩廣督臣祁璜奏開奇才異能五科內有製器通算一門咸豐初年御史王茂蔭亦曾言之同治九年閩浙督臣英桂等奏開算學科先後部議皆以格於成例中止特是九數居六藝之一周禮以之興賢能明算列六科之中唐制以之程選舉我朝 欽定數理精蘊儀象考成諸書尤爲萬世學算之準繩故定制於國子監額設算學肄業生滿蒙滿各若干人分年教授是天文算學本學人所當童而習之者竊以列聖開物成務 睿謨深遠旁探西洋之巧算融入中法之精微以制器而論則 御製天體赤道諸儀既已邁古燦今卽下至行軍火器之利亦嘗俯採西法康熙中每遇征討之役 命欽天監官南懷仁湯

若輩造礮隨軍此其明證而世人或曰算學爲西學始末之深察也且卽以西學而論其人材半出於格致書院以理法攝其聰明亦半出於水師練船以閱歷堅其腦識而不特考校文字一日之短長以進退之三角八線幾何代數誠爲西學根本然西學以測算始實末嘗以測算止故近年南北洋船政各處設立製造管駕武備水師學堂擇其藝成者入練船習學又拔其尤者充補水師員弁以造就人才有裨實用良以西藝亦非算學一端可盡而從事於大算者未可遂謂之練習洋務也惟查製造各學未嘗不採源於算術誠有如該御史所稱名目雖繁樞輿於此者欲盡取西學之所長殆必以算學爲先導但使選舉有法亦可資激勵而廣招徠臣等就原奏所陳公同商酌試士之例未容輕議變更而求才之格似可量爲推廣擬請 旨飭下各省學臣於歲科試時生監中有報考算學者除正場仍試以四書經文詩策外其考試經古場內另出算學題目果能通曉算法卽將原卷咨送總理各國事務衙門復勘注册俟鄉試之年按册咨取赴總理衙門試以格物測算及機器製造水陸軍法船礮水雷或公法條約各國史事諸題擇其明通者錄送順天鄉試不分滿合員皿等字號如人數在二十名以上統於卷面加印算學字樣與通場士子一同試以詩文策問無庸另出算學題目其試卷由外簾另爲一束封送內簾比照大省官卷之例每於二十名額外取中一名但文理清通卽爲合式如並無清通之卷任缺無濫卷數雖多亦

不得過三名以示限制其錄科之卷總理各國事務衙門於揭曉以前咨送禮部備查至會試向無另編字號之例凡由算學中式之舉人應仍歸大號與各該省士子合試憑文取中如此則搜求絕藝之中仍不改科舉取人之法似亦獎勵人才之一道至學堂練船中學已有成已得官職或不願投考者仍歸該管大臣核計年勞保獎與考試一途兩不相妨此項人員若於會試中式後得用京職恭候 點派數員作為同文館纂修傳專講習嗣後或游歷外洋或充出使等差均可隨時奏派因材器使庶洋務非託空言而得力與藝成而下者自有間矣得 旨如所議行○乙酉以奎順署西甯辦事大臣○丙戌欽奉 慈禧端佑康頤昭豫莊誠皇太后懿旨嗣後各該省於海防應需購買器械撥用經費等項均著先期咨報海軍衙門斟酌妥籌再行辦理○是月比利時國使臣維禮用回國參贊米師麗署理

閏四月戊子朔諭邊寶泉奏參知縣虧短交代請分別查抄勒追等語河南已革署正陽縣知縣項則周已故署蘭儀縣知縣唐毓衡虧短交代銀兩前經勒限追繳迄未完解實屬玩延項則周唐毓衡各任所寓所資財及原籍家產著一併查封備抵並提集經手丁書嚴訊是便是挪按例究辦休致宜陽縣知縣謝應起虧短正雜銀兩其鉅著摘去頂戴勒限兩月追繳○己丑以沈秉成署刑部左侍郎本格署鑲藍旗滿洲都統○劉秉璋奏前准總理海軍衙門咨光緒十二年七月十四日具奏酌議保獎章程並聲明

部察礙情形請量爲變通等因一摺本日欽奉 諭旨依議欽此恭錄並刷印原奏咨行欽遵查照在案臣查川省自光緒三年九月奏設機器局遴委曉暢機器候選同知曾昭吉專司製造於城內擇地建廠開工試辦經前督臣丁寶楨檄調候補道黃錫鑾來川會同成綿龍茂道督飭委員在局經理年餘規模初立五年三月奏文停止六年四月奉 旨復開仍委成綿龍茂道會同候補道黃錫鑾督率委員曾昭吉候選巡檢高啟文等復行開局添製機器漸次推廣該委員曾昭吉等心思奇巧不用洋人招考本地工匠學徒仿造外洋鎗礮等項並創製水輪機器運動各廠可省鍋爐火力經費之半又於城外設局專用水機製造洋火藥數年以來該道等督率在局任事各員莫不殫心竭慮精益求精業經造成機器三尊又機器一千五百九十件各種洋鎗一萬四千九百一十三桿洋火藥二十八萬五千九百九十餘斤銅火帽一千三百七十五萬顆後膛藥彈六十八萬五千五百七十顆鉛子六十萬五千顆洋礮三尊歷經委員解交籌餉局收存陸續轉發各營操防並協濟雲南廣西及鮑營軍火各在案伏查局中製造工程奇險汽機之迅厲藥性之暴烈稍未得法皆足致命該委員等冒險從公著有成效茲據成綿龍茂道承厚候補道黃錫鑾援照海軍章程詳請奏獎前來臣查川省機器局自光緒三年開設及六年奉 旨復開起迄今已屆八年該委員司事等歷年在局不避艱險造成機器鎗藥等項撥發應用均屬合式非辦



理尋常局務勞績可比核與海軍衙門原奏沿海省分操防機器皆爲固圉要務比照海軍保獎年限擇尤酌保章程相符謹將擬保各員開具清單恭呈 御覽該員等或總司製作或監視工程及總理各所事務實屬尤爲出力前於光緒十年報銷案內曾經造具銜名清冊咨部有案合無仰懇 天恩俯賜敕部查照海軍章程從優給獎以示鼓勵之處出自逾格 鴻慈下部議奏○裕祿等奏 臣等前准部咨會議整頓錢法案內奏令例應鼓鑄各省趕緊籌款開鑄等因當經 臣等將鄂省從前鼓鑄情形暨現在參仿閩省章程撥款試辦緣由先行附片具奏一面督飭司道遵委委員採辦銅鉛開爐鼓鑄並試鑄錢樣考核銅鉛折耗成本盈絀飭由該司道等通盤籌計妥議章程辦理現據湖北鹽法武昌道江人鏡候補道翟廷韶會同藩臬兩司將所議章程大條連同試鑄錢樣詳請具奏前來 臣等伏查鼓鑄之要必須先計成本現既今昔情形互異辦法亦當因時制宜總冀力求核實使成本無虧庶幾可期經久從前鄂省鼓鑄銅鉛購自滇黔折耗悉按成例計實武局向設十爐每年額定二十一卯一尼共鑄錢八萬五千八百五十餘千文每鑄錢百斤例配銅五十四斤鉛四十六斤加火耗銅鉛九斤又每鑄淨銅鉛百斤給工炭料錢一千五百五十七文考察當時銅鉛價值及運腳雜費等項以一年額鑄錢數計之成本無折無虧此次所議章程參仿閩省購辦洋產銅鉛按銅五鉛五勻配足數屢經銘驗每銅鉛百斤入爐實有

一十五斤折耗第現議祇將例准折耗之九斤歸入成本作正合算支銷其餘例外所耗之六斤另由本省辦欸生息彌補不動成本正項將來錢局停鑄原本仍可提還於公款並無虧損計一年額鑄錢八萬五千有奇以通年例支工本兩相核較可得盈餘錢二千六百三十餘千文近來洋產銅鉛各省購辦者多如日後價值增長卽可以此項按卯所鑄餘錢留備銅鉛漲價之用至在局員役一切薪費等項皆爲辦公必不可少之需今鄂省亦擬參仿閩省成案月定局用經費二百兩在於本省外銷欸項設法勻撥不歸成本計所議均尙核實現在籌辦建局募匠等事皆已就緒卽飭暫照現議章程按卯開鑄俟奉到部覆後屆滿一年照例造報核銷其餘未盡事宜仍當督令該司道等隨時悉心經理下戶部知之○托倫布奏奴才所管察哈爾八旗額設理刑滿蒙員外郎各一缺專理刑名之責滿洲員外郎缺出由京旗考取補授本任今正該司員等進口奴才一一接見詢問公事均能熟悉律例清文蒙語亦皆通曉實爲京員中可造之材惟皆襁褓不堪形容憔悴正欲訪詢而該員等紛紛請借盤費銀兩查此款尙未解到若爲墊借無欸可籌奴才是以批駁乃該員等復又聯名稟稱除本任應領盤費銀每年五十一兩六錢之外別無領項因而異常拮据困苦無措委無生計情詞懇切再三請借前來奴才見其形狀似屬實情當飭司詳查何以如此據稱溯自咸豐四年以後庫欸支絀一再裁減嗣該員等若因公出署會廳相驗

等差尙藉本旗例供烏拉可資往返至前數年間因牲畜遭災遂卽裁撤是以近年專恃盤費一項不無  
苦累等語奴才覆核無異然就便籌措亦非經久之計況口外游牧已墾成熟蒙民雜處詞訟較先愈繁  
率皆蒙民交涉例應會廳是該員在本署之日少會廳之日多往返旅寓又無廉薪烏拉確屬苦累難支  
令其枵腹從公實堪憫惻奴才目覩實情豈忍坐視現京員俸餉已然足放而由京出差人員似宜量加  
體恤惟部庫正當節儉之際奴才何敢請欸然此數員若不亟爲圖維將使在者困迫待斃而來者視爲  
畏途且無以示策勵而資觀感惟有仰乞 天恩俯念京員口外當差領項過微委辦生計可否每員每  
季酌加津貼銀二十兩以資餬口計八旗左右司印房理刑官掌印幫印十二員每歲所費無多該員卽  
可敷衍既免甌窳內顧之憂自必益加奮勉如蒙 俞允卽由 奴才衙門茶馬釐捐截剩項下按季提放  
併入正案核銷得 旨如所請行○庚寅李鴻章奏據按察使陶模詳稱定例奉天匪徒糾夥搶奪不論  
人數多寡曾否傷人有一人執持烏鎗搶劫者不分首從照響馬強盜例擬斬立決賜示誠以烏鎗爲害  
最烈數十步外卽能制人死命故定罪與執持尋常器械不同所以懲強暴重人命法至當也直屬此等  
人犯尙照執持尋常器械一律辦理但近來匪徒往往執持烏鎗洋鎗糾夥搶劫殺傷捕人肆無忌憚  
畿輔重地豈容兇賊日張自應變通向例從嚴懲創又定例廣東廣西匪徒如有將十五歲以下幼童捉

回勒贖罪應斬絞監候者加擬立決罪應道中者加擬絞監候罪應擬徒者發極邊足四千里充軍又該二省捉人勒贖之案如被捉數在三人以上及擄捉已至三次以上同時並發除被脅同行或本罪已至斬立決無可復加外其罪應絞監候者加擬立決罪應道中者加以絞監候罪應徒者發極邊足四千里充軍又如審無凌虐重情止圖獲利關禁勒贖至一百二十兩以上者首犯照搶奪滿貫例擬絞監候此係本爲兩廣匪徒而設其餘並無擄捉幼孩及計贓計次計人數作何治罪明文惟近來直屬時有幼孩被捉及擄捉多人多次並贓逾滿貫案件俱照尋常止圖獲利關禁勒贖之例擬以道事實覺情浮於法亦應變通辦理擬請嗣後直隸省遇有強劫及竊盜臨時行強並糾夥十人以上搶奪之案但係在場之犯有一人執持烏鎗洋鎗不論曾否傷人比照奉天辦法無分首從均擬斬立決賜示至結夥三人以上搶奪究與十人以上有間應予區別其執持洋鎗烏鎗之人如係首犯亦擬斬立決賜示爲從犯擬斬立決傷人者仍加賜示未經持鎗者仍照向例辦理若竊賊施放烏鎗洋鎗拒捕一經成傷無論護賊護夥圖脫及臨時事後所傷是否事主爲首及幫同放鎗拒捕之犯皆擬斬監候秋後入於情實殺人者俱擬斬立決賜示尋常行竊及搶奪僅止一人或二人但係執持烏鎗洋鎗之犯雖未拒捕均發極邊充軍捉人勒贖之案除被捉並非幼孩及擄捉不及三人未至三次並贓未滿貫者仍照向例辦理外如有

將十五歲以下幼孩挽回勒贖並被捉數在三人以上及擄捉已至三次以上同時並發及計贓在一百二十兩以上者均照兩廣之例辦理等情具詳請奏前來臣查直屬近來常有匪徒執持鳥鎗洋鎗夥劫傷人及擄人多次勒贖之案該司所詳係爲嚴懲兇暴整頓地方起見洵屬因時制宜亟應照辦理合恭摺具陳得 旨刑部速議具奏○乙未裴蔭森奏臣於光緒十一年十二月初二日奏報鏡清快船下水並請擇尤獎勵一摺奉 旨此項輪船著俟試洋後如果駕駛得力毫無流弊再將出力人員擇尤請獎欽此復於去年七月十二日奏報該船試洋赴甯摺內更申前請奉 旨著照所請該部知道欽此欽遵符在案嗣准南洋大臣曾國荃咨稱驗得該船機器精良行駛迅速有駕於各船之上洵稱靈快出自中國放手自造實爲近今所僅見等語咨覆前來臣查船政邇年以來製造之精不亞於外洋工程之大有僭於曩昔藝益精則功甚懋時愈久則勞愈深溯自光緒五年間鐵務告成經前總理船政臣吳贊誠奏獎以後員紳之殫勩匠徒之勞悴與夫將弁書吏之辛苦則又事更八年船成六號也在事者櫛沐風雨宣力積年不能不資以鼓舞而在下考核有素尤不敢稍涉冒濫之愆既蒙 天恩鑒及微勞疊 准保獎自應擇其尤爲出力者分繕清單加具考語恭呈 御覽謹候 鴻慈得 旨該衙門議奏○內中子故湖南提督周寬照軍營立功後病故例議卹戰功事蹟交國史館立傳○子故前署湖南提督王永章

戰蹟交國史館立傳○庚子以安徽婺源縣已故大學士左宗棠祠列入婺源縣祀典○辛丑欽奉 慈禧端佑康頤昭豫莊誠皇太后懿旨皇帝大婚典禮崇隆允宜先期預備一切應辦事宜著派總管內務府大臣遵照會典敬謹辦理國家經費有常目下整頓武備需款孔多各省時有偏災尤宜體念民間愛惜物力朝廷躬行節儉爲天下先該大臣等務當仰體崇實黜華之意嚴飭承辦各員認真經理不准稍涉浮冒所有支發款項著醇親王隨時稽查以明核實至各衙門應行備辦事宜並著敬稽典禮先期具奏候旨遵行○癸卯劉銘傳奏 於光緒十二年四月並九月剿撫南北各路番社情形先後奏明在案上年十月據署臺灣道陳鳴志統帶鎮海後軍副將張兆連先後稟稱後山番社未撫尙多番在深山之內北抵蘇澳岐萊南至埤南恆春若由水尾適中之地與前山彰化遙遙相對開通道路聲氣聯絡先撫後山中路其餘聞風向化招撫較易否則一撫之後聲氣仍然隔絕徒糜經費難求實效等因 臣當檄署臺灣鎮總兵章高元統帶礮隊並鎮海中軍前營定字左營及練兵七百人兼僱石工民夫由彰化境之集集街開山而東張兆連由水尾開山而西兩面刻期會辦章高元率勇由拔埔社開至丹社嶺計修路一百一十二里張兆連自水尾開至丹社嶺計程六十里均係崇山峻嶺該鎮等鑿石伐木自冬至春一律修竣張兆連當乘開山軍勢即派管帶黃定國畢寶印先將水尾南北川丁仔老等二十四社番丁四

千餘人招撫歸化一律薙髮擇立社長頒給憲書條款使奉正朔次由花蓮港至岐蘇沿山一帶招撫他  
良等十二社番丁二千餘人當有毗連岐蘇之大魯閣爪等社丁眾勢強意圖抗拒張兆連因大魯閣社  
爲北路最強之番若招撫歸化則岐蘇一帶即可一同就撫親帶三營隊伍駐紮山口營曾開礮攻剿該  
社番目廉貴溢等畏威乞撫並願同大馬鞍大吧聖等五十三社一同歸化先後薙髮一萬五千餘丁此  
水尾至花蓮港後山北路番社一律歸化之情形也張兆連於北路生番歸化之後卽會同埤南同知歐  
陽駿移軍向埤南平埔一帶內山招撫南路生番平埔以南各社以呂家旺左右爲最強該社地大丁眾  
雄其僑偶不獨不遵薙髮之令且統眾強阻附近各社不准就撫各番因而觀望張兆連歐陽駿當傳通  
事米清吉到營告以該社素行恃眾藐法此次是降是抗立即回報一面滾營進紮耀兵山麓呂家旺番  
目卞海盈齊骨獅康大龜等見官軍逼近勢在攻剿聚謀數日各隨通事到營乞撫並約同附近巴六凡  
等二十六社一律歸化並有八佬等十三社亦聞風歸化統共薙髮番丁一萬三千餘人其毗連恆春鳳  
山兩縣屬境層巒疊嶂內有番社在鳳山轄境者以三條崙爲大枝在恆春轄境者以高山牡丹灣爲大  
枝張兆連督同鳳山營都司藍鳳春管帶林維楨分道進山招撫三條大僕等十五社高山牡丹灣阿厲  
等二十二社中心崙等四十二社又飭管帶黃定國畢寶印招撫大關大打臘打南等十二社地極幽深

各番皆伏處山頂寒苦異常自呂家莊至大關等處共撫一百二十九社計番丁三萬五千餘人此埤南  
惺鳳所屬後山南路番社一律歸化之情形也鳳山所屬前山尚有未撫各番臣上年檄飭統帶鎮海前  
軍副將陶茂森率隊由牛欄棍內口半路店招撫沙摩溪等六社由山猪門招撫柏葉等十八社由萬全  
店招撫莪箕等四社統計二十八社番丁一萬二千餘人均皆離難歸化其毗連臺灣嘉義兩縣所屬內  
山未降番社經署臺灣道陳鳴志檄飭鎮標中軍易豫俊招撫大埔等二十四社番丁四千三百餘人又  
派游擊劉志坤續撫大武龍內攸等四社番丁四百餘人章高元由彰化水底寮開路至埔裏社沿山招  
撫北港萬巒等五大社眉毛納叻叻等四十四小社番丁九千餘人又由拔埔社開路至丹社沿路招撫  
卓大意東等大十一社番丁八千餘人中路嘉彰之交經斗六門縣丞陳世烈於雲林坪設局招撫沿山  
郡番十六社蠻番丹番等三十七社番丁四千餘人樟腳桶子脚等七社番丁四百餘人均先後離難歸  
化新竹前山番社上年已一律歸化惟內山石加碌京孩兒等百餘社素行兇悍降番嬰民屢受其害仇  
殺不休迭據民番稟請調兵剿辦臣於上年十二月檄飭道員林朝棟督同營官鄭有勳兩營隊伍前往  
相機剿撫林朝棟率帶正營由十八孩兒社進攻石加碌南路派令營官鄭有勳率領副營由西熱進剿  
石加碌北路各帶化番數十名爲之嚮導深入內山七十餘里節節開路築卡石加碌並哇西熱煤聚雲



中明都都等十七社番衆見官兵分道深入畏威乞降並願勸導京孩兒南界密拿佬社一同歸化林朝棟當派鄺有勳率帶化番親往京孩兒邊界將密拿佬牙蘭布南口等社土目哇素老哇油老瓦丹打勞邦朗等生番二十四社一律招撫歸化此前山各路自冬至春續行開山撫番之情形也查臺灣生番種類繁多處處與民仇殺自上年九月臣親督大隊剿撫中北兩路生番歸化後現在數月之間所有後山各路生番二百一十八社番丁五萬餘人一律歸化前山各路續撫生番至二百六十餘社番丁雞髮三萬八千餘人水尾花蓮港雲林東勢角等處可墾水旱田園數十萬畝不獨開闢闢地且可免民番仇殺之禍此皆 朝廷威福遠播遐荒使深山幽谷野居穴處之類咸知向化歸仁化慘狃而登衽席實非微臣意料所及惟招撫愈多經費愈大現在捐輸截止經費支絀異常臣已檄飭各軍仍回防所籌畫設官分治俟有經費再行續撫以期全臺生番一律歸化查前後山將士自開山撫番以來披荆勦棘奔走於深山窮谷之內從事於蠻烟瘴雨之中兩年以來備嘗艱苦不無微勞足錄所有尤爲出力之總兵銜閩浙儘先補用副將張兆連留閩補用副將協勇巴圖魯陶茂森均擬請以總兵 記名簡放候補守備鄺有勳擬請以都司儘先補用並 賞加游擊銜其餘在事出力官弁可否由臣彙案請獎以示鼓勵之處出自 逾格鴻慈 上諭劉銘傳奏臺灣各路生番歸化並開山招撫情形請將出力將領獎勵一摺

覽奏均悉蘇藩前後山各路生番於上年十月經劉銘傳札委將領開通道路設法招撫數月之間後山  
南北兩路生番二百八社番丁五萬餘人前山各路生番二百六十餘社番丁三萬八千餘人均各次  
第歸化開墾田園數十萬畝辦理尙爲妥速劉銘傳督率有方深堪嘉尙其尤爲出力之副將張兆連陶  
成森均著以總兵記名簡放守備鄭有勛以都司儘先補用並賞加游擊銜其餘在事出力員弁准其彙  
案請獎毋許冒濫○甲辰 上幸北海關射○戊申克蒙額等奏綏遠城八旗滿洲蒙古二十佐領下現  
有額設領催前鋒馬甲二千名步甲七百名養育兵六百名統計男婦老幼人丁一萬餘名口奴才等每  
逢操練之期間其兵丁尙屬強壯惟滿城街巷清苦異常去歲夏間山西撫臣剛毅親詣口外巡閱營伍  
行抵歸綏亦曾目覩滿城異常困苦奴才等體察情形緣自咸豐三年以來該官兵屢次奉調前往江南  
河南安徽等省出征並製造糧鎗等械又復疊次捐備戰馬賠累已深伏查現有領催八十名前鋒二百  
名照例每名月支餉銀四兩馬甲一千七百二十名照例每名月支餉銀一兩五錢自咸豐四年奉准部  
文官員應領俸銀每兩核扣三錢並減平銀六分實領銀六錢四分兵丁除步甲養育兵外領催前鋒馬  
甲月支餉銀每兩核扣二錢卅領銀八錢至該官兵月支米石因各廳地欠繁繁解不足額又不能按期  
關領此官兵等用度艱苦之實在情形也況歸綏地方西通甘肅北與大青山後草地毗連處處可通殊

爲督邊首嬰之區較諸他省情形不同操練巡防不敢稍涉鬆懈奴才等反覆思維現當力求節省曷敢妄議增添惟因所屬官兵自俸餉減成放給以來迄今三十餘載用度甚形艱苦再四熟商合無籲懇天恩俯准綏遠城添設養育兵四百名援照舊有養育兵每名月支餉銀一兩五錢月需銀六百兩一年共需銀七千二百兩遇閏加增六百兩藉資養贍可否之處出自 聖裁下部議奏○己酉予故三品卿銜前雲南巡撫林鴻年學行事蹟交國史館立傳○癸丑張之洞等奏瓊州黎匪自攻克陳鍾明什密老巢平燬馬嶺廖二弓十八村匪寨後軍威已振西峒逆首陳汶中馬嶺逆首黃清廖二弓逆首那肥卽胡那肥那閃陵水逆首丁鬚生藍紅衫胡明時樂會逆首賴文成等負隅抗拒死黨尙多又有僞大將軍鄒顯章係光緒七年閏七月奉 旨飭拿未獲之逆首瓊民多罹其害均應亟爲剿辦以伸國法而快人心當經提督馮子材派直隸州知州劉保林督率部勇剿辦那肥一股道員楊玉書知府馮相榮率軍追剿陳汶中黃清各匪分飭紳團搜捕餘孽上年十一月二十七日探知那肥踞廖二弓老巢濠深巖密上列礮石爲死守計劉保林派隊進攻先燬堅木柵十餘層該逆猶抵死不退二十八日我軍直逼老巢以火箭飛射寨中知縣石佩瓊主簿楊士丞巡檢楊桂振等繞出山後圍攻自辰至午賊勢不支棄巢向後山越竄石佩瓊督勇猛追那肥中鎗倒地經楊桂振割取首級逆黨回援楊士丞猝爲飛彈所中登時陣亡

各軍四面兜擊殄斃悍賊百餘名奪獲鎗械三百餘件陣亡勇丁九名受傷三十餘名生擒匪供那肥鎗斃屬實餘匪逃出無幾維時陳汶中竄入陵水首弓之打鐵村十二月初一日楊玉齊馮相榮暨團紳譚喬紳分帶兵練馳往圍捕該逆奪門狂竄練長林明志奮勇持關鎗斃逆首陳汶中練長吳金章生擒僞先鋒胡那耀並斃匪夥多名初七日楊玉齊馮相榮劉保林移營廖二嶺尾逆首那閃率黨出柵拒戰猛驚異常我軍合力圍攻破傷該逆左腳始經擒解交馮子材大營訊明梟示連日各軍剿捕搜山丁黨生藍紅衫胡明時三逆以次就擒總兵林長福率萃右軍搜剿烏坡一帶餘匪初一至初五等日將橫山固賊寨一併攻燬生擒賴金昌王打狂等匪殲斃逆黨數十名我軍亦有傷亡知府馮相華率萃中軍分搜定安望天嶺天峒嶺一帶擒斬逆匪賴文才夥黨黃亞二等九十餘名萃右軍擒獲逆首賴文成暨匪黨胡鳳尾等八十餘名劉保林所部萃左軍擒獲黃昌明等一百餘名萃前軍擒獲林成珍等一百八十餘名均係積年黨匪供認迭次殺掠不諱經馮子材先後飭令正法東中兩路匪勢已經渙散惟鄭顯昌黃清未獲十二月二十一日偵知鄭顯昌率其死黨盤踞萬州黎峒馮子材飭署萬州營游擊方敬選派弁兵會合萃軍馳往圍捕千總張德星五品軍功朱廷光首先奮勇深入黎巢將該逆生擒解營正法本年正月十二日馮子材自赴寶停司督剿令馮相榮劉保林分率勇團搜山是夜躡及黃清於廖二弓灣

洲地方都司陳榮坤守備劉步高連鎖繫斃之令降黎認明屬實並將平日濟匪致富被掠多案之土棍李榮詰拿獲正法合縣稱快當奉軍暫移瓊南之時中路定樂毗連之嶺門烏坡一帶尚有餘匪當經臣之洞由省另派福軍四營益以土勇兩營前往搜剿撫定其西路客匪黃鄉保溫河清夥黨前次雖經投誠渡海安插仍復潛回故地伺便糾眾劫掠怙惡不悛法難寬宥有經道員方長華派軍擒斬匪首陳贊桂匪目張秀生鄧亞生賴官生等四十三名稍輕者分別發交州縣懲禁保釋仍飭該處紳團勒拿餘匪以期安輯又有儋州匪首陳鍾銘藉報復爲名糾眾滋擾感恩地方焚殺淫掠黎漢各村均被其害上年八月奏明在案方長華派府經歷毓濂等設法擒獲交馮子材大營訊辦以上情形接據馮子材暨方長華楊玉昇護借環道謙貴等節次咨報稟報前來計定樂陵萬澄感恩各匪俱已漸次廓清惟崖州一屬處瓊郡之極南距府城將及千里山谷最深瘴毒最重從古人跡未到之處該處生歧最悍自道光九年至十一年戕官爲亂經前督臣李鴻賓督軍剿平卒以官軍未能深入草林嶺以北黎村自此叛爲生黎不納丁糧抱寨抱丑打蕩等村黎匪四出焚殺甚慘紳民屢經稟請剿辦又陵崖交界之下馬嶼在五指七指之間地勢深險素爲匪窟此兩處尤應乘機戡定此時將士久勞餽餉不易然不就此兵威一徹底定則瓊地病根未除聲教終梗以後難期再舉臣之洞熟加籌度亟宜恪遵一勞永逸之論廓清崖境以竟

全功當經與馮子材電函定議激勵諸軍多備醫藥移師南路病者撤出醫地調養壯者鼓勇深入令馮相榮馮相華劉保林等三軍由東路進方長華一軍由西路進會合柳團分別剿撫務令直抵生歧巢穴應俟辦有端倪再行奏報此萬陵各匪肅清後現又移辦崖匪之實在情形也現在亂黎漸稀則撫定良黎有可措手臣之洞酌擬撫黎章程十二條刊發傳佈一官軍此舉專爲剿除亂黎招撫良黎開通十字大路以慰黎漢永遠相安其良黎秋毫無擾毋庸畏懼一從前爲匪黎人投誠者免抗拒者誅擒斬來獻者重賞一投誠各黎無論生熟一律薙髮改裝一投誠黎首開送戶口冊捆獻匪徒繳呈鎗械一投誠黎衆隨大軍伐木開山前驅嚮導仍按計里數酌給賞犒一將來開通生黎大路後選擇要地設官撫治安營彈壓各村黎長助剿匪路有功者授爲土目就中酌設局總土目數人散目給頂戴總目授土職自爲約束仍聽地方官選黜略仿黔滇各省土司之例不令吏胥索擾一開通後黎人仍安生理有主之田斷不能強奪惟抗拒者籍產入官充軍屯田之用一開通後田業三年內不收賦稅三年之外務從輕則起徵斷不苛斂一開通後黎境有礦各山由官商合採者給錢租賃絕不強行佔踞黎漢均享其利一開通後民人鹽布百貨與黎地牛馬糧藥等物在各峒口設場互市來往暢通公平交易嚴禁漢民訛賴盤剝總令於黎人有益一設立土目之後應各具永遠不敢殺掠抗官藏匿匪徒切結存案所屬有犯責成該

土目拿送到官按律懲辦一每數村仿內地設一義學延請塾師習學漢語漢文宣講 聖諭廣訓所需

經費就地籌辦令在籍紳士總兵林宜華副將符鴻升等分道通曉黎語團紳經歷各峒剴切宣諭其霞  
黎苗黎畔黎乾脚歧各種類多裸處酌給衣袴令其漸被冠裳之化馴其頑悍之俗現據各路稟報已經  
薙髮改裝就撫造冊者東路丁口三萬餘北路一萬餘西路四萬餘查撫黎以開路爲先開鑿險隘焚  
林莽令其四通八達陽光照臨人氣日昂則風瘴自消水毒自除前代雖有開通十字路之議迄未舉行  
康熙二十年瓊州鎮總兵吳啟爵剿南勞峒黎後亦曾議及中作而輟綜考黎峒形勢北以十萬峒之牛  
欄坪爲要東以太平峒之什密爲要東南以寶停司爲要南以羅活峒之安司爲要西南以古振州峒爲  
要西以紅毛峒之凡陽爲要皆出入衝要可以屯兵足食之所茲擬開大路十二道一由樂會之嘉濟市  
西行經石壁船埠加嶺中平河濫出五指山之北西抵牛欄坪此爲東北路一由萬州之興隆五甲西北  
行經長沙營什密禁會南峒七村出五指山之東亦抵牛欄坪一由定安之銅甲口西北行過毛祥口出  
五指山南西抵五指山水滿峒一由陵水之烏牙開至寶停司又由崖州之簾橋亦開至寶停司再由  
寶停司西行橫開一路越七指山抵崖州屬樂司此爲東三路均責成道員楊玉書辦理一由崖州東之  
三亞口西北行越華林大嶺出五指山之西抵凡陽此爲東南路責成道員楊玉書暨知府馮相榮馮相

華辦理一由儋州南鹽市東行經大水番崙元門紅毛合棘諸峒東南抵五指山下水滿峒一由紅毛峒南行經番鸞毛厝諸峒出五指山之西北經凡陽南抵榮安司一由儋州之調南市東南行經七坊刀鉗諸峒南抵感恩古振州峒北爲西三路一由昌化東行經古振州峒東亦抵樂安司此爲西南路均責成道員方長華辦理一由崖州西之九所市北行經樂平汛東北抵樂安司此爲南路責成署崖州知州劉保林署崖州協副將方敬會合方長華辦理一由定安之嶺門南行經蛇峒十萬峒牛欄坪南勞峒抵五指山過山南至水滿峒此爲北路一由嶺門西南行經三坎溪猪母灣加釵峒出黎母山之南抵紅毛峒此爲西北路責成督帶福軍同知孫鴻勳辦理統由馮子材考核督催並飭瓊州道府激勵各屬紳團同力協助大率參考前明海瑞徵大猷諸人之說加以變通推廣所開之路如井字形其餘各州縣團夫分開小路以合於大路縱橫貫通同時並舉分地定限會合聯接勇團土黎併力作工以一丈六尺爲度極險仄處以八尺爲度人力所不能施者以炸藥轟裂之所到之處伐木焚莽搭橋鑿井經過黎歧隨宜撫定分遣員生測繪並令沿途察看各河道是否可行船筏以備運出老山材木百貨測看各山礦苗種類以備開採山內地形土性宜於種植何物以阜物產而贖瓊民路通地闢之後應於山內要隘險處所建隘城寨設官安營以資化導控制舉辦一切俾此奧區永爲樂土竊惟瓊郡唐代建州置縣以來峒



黎叛服不時屢煩兵力良由山深林密恃險爲患外匪附和荼毒益深勞費防守直無安歲與臺灣生番情形無異乃蒙 聖主明見萬里採兵部侍郎曾紀澤之奏特頒 諭旨令籌經久之計臣等仰秉宸謨策勵諸將稔惡亂黎誅擒殆盡開荒墾險漸化榛莽目前路工已得十分之四約計五月間路工可一律告成羣黎亦可撫定一切善後事宜臣等當妥議奏陳所有疊次攻克萬陵等處匪巢殲除首要以及深入老山撫黎開路各員弁艱險勞瘁迥異尋常應懇 恩施由臣等存記俟全瓊肅清後彙案奏請獎敘出自 鴻慈逾格得 旨覽奏均悉卽著張之洞等將剿撫各事宜妥籌辦理以靖地方所有出力各員弁著俟全瓊肅清後准其擇尤彙案保毋許冒濫○甲寅陳奏查皖省自蕪湖新開通商口岸以後各國民人遠來不輟於途卽傳教之士亦紛至沓來各州縣民教雜處時有交涉事件光緒三年經前撫臣裕祿飭令於安慶省城設立洋務總局以安風潮和道綜司其事另委知府一員駐局專辦同通州縣二員佐雜三員分任文案應對兼出外差事件規模粗具事極繁雜枝節叢生易滋弊端全在熟諳洋務明白穩練之員迅赴事機會同地方官按照條約妥慎辦理數年以來尙無貽誤惟當時設局並未奏咨有案所有局中一切公牘均係蓋用安慶道關防亦未另刊戳記每遇緊要洋務文告呈馳難期迅速現擬刊刻安徽洋務局關防一顆發給開用俾一事權而昭慎重其局中委員如能辦理出力始終無誤

並請查照部章併屆三年期滿准予擇尤保獎以示鼓勵據委辦洋務總局司道會同妥議章程釐定功過詳請奏咨立案等情前來臣覆核無異除將各委員銜名及釐定功過章程列摺咨送部科暨總理各國事務衙門查照外謹會同南洋大臣兩江總督臣曾國荃附片陳明下所司知之○乙卯李鴻章奏准總理衙門咨開會議御史陳瑞奏開算學取士一疏請旨飭各省學臣於生監中考取算學生各送總理衙門考試覆核等因仰見朝廷選才惟廣勗業務精爽名欽佩臣思西學所長雖以算學為先導而節目繁多日新月異如總理衙門所試格物測算及機器製造水陸軍法船礮水雷等藝似非佔畢儒生照守九章成法者所能盡其廣博臣於光緒六年七月奏開天津水師學堂挑取各省良家子弟專習駕駛八年四月又分設管輪學堂其習駕駛者則授以天文地理幾何代數平弧三角重學微積駕駛御風測量演放魚雷等項其習管輪者則授以算學幾何三角代數重學物力汽理行船汽機機器畫法機器實藝修定魚雷等項十一年正月又奏開武備學堂調取各營中頭異少年授以兵法地利軍器礮臺算法測繪及步礮馬隊操法近更考取幼生文識粗通者課以幾何代數重學測量礮準等書查學堂之設雖為造就將材起見要皆以算學入手兼習經史其中亦有文理清通而志切觀光者倘異日得由科甲進身則文武兼資未始不可為禦侮干城之選惟該學生等籍隸各省程途遠隔若令先期回籍靜候

學臣按臨未免廢時曠課臣再四思維當茲洋務奮興之際既欲惜其寸陰又體國家作人之方未便阻其進取合無仰懇 天恩俯准於鄉試之年除各省士子兼通算學者由本省學臣考試咨送外所有天津水師武備學堂學生及教習人員屆時就近由臣遴選文理清通者開單咨送總理衙門聽候考試錄送一體鄉試以資鼓勵而廣登進若倖而獲雋仍歸學堂及水師陸軍調用俾收實效得 旨該衙門議奏○劉秉璋奏上年重慶民童打教滋事之犯前獲石開陽之子石匯一名業經併入羅元義雇殺渝民多命案内奏奉 諭旨一併斬梟在案嗣於十二月二十四日復經已革巴縣知縣國璋派撥勇役懸賞緝線在貴州餘慶縣地方將石開陽拿獲解省發府提回王明堂審明定擬解由按察使游智開轉勘到臣隨即提犯親鞫緣石開陽即石興受與王明堂分隸綦江縣巴縣王明堂平素行醫度日光緒十二年六月初一日教民羅元義因渝民打毀教堂率眾滋擾損厝吳炳南等糾眾持械將渝民毆斃斫傷致斃三人追逐踏斃八人六月半間渝民因羅元義殺傷多命益激公忿糾集五十餘團約三千餘人二十四日至白菓樹教堂滋事石開陽與子石匯一同前往維時王明堂赴渝醫病經素識之楊子青等誘令王明堂同行王明堂徒手往觀不期主教聞知先期有營勇在彼彈壓因此互鬪王明堂隨同楊子青等鬪喊助勢石開陽用鐵扒將楊什長紅旗格落石匯奪過楊什長手內尖刀將其戳傷倒地當即殞命楊

子青等聲喊放火王明堂畏累先逃石開陽等隨同團眾復將教堂用火燒燬分路逃逸經前護督臣奏  
奉諭旨飭拿經該縣拿獲王明堂石開陽解省發府審供定擬將石開陽併入羅元義屬殺多命案內奏奉  
諭旨處斬梟示聲明王明堂未經供認旁無質證應俟拿獲朱姓石開陽質審另辦各在案石開陽因  
差拿嚴緊逃至貴州省餘慶縣地方藏匿經國令派撥勇役懸賞購線躡至將該犯石開陽拿獲解省發  
府覆審定擬解司勘轉前來臣提犯親鞫據供前情不諱案無遁飾查例載兇惡棍徒糾眾商謀計圖得  
財放火故燒官民房屋已經燒燬搶奪財物者均照強盜例不分首從擬斬立決誘脅同行者杖一百徒  
三年又查例載斬罪無正條援引他律比附定擬各等語此案石開陽即石興受因渝民以羅元義屬眾  
殺傷多命憤恨集團向白菓樹教堂滋事該犯與子石開同往將奉調之營勇楊什長旗幟格落致伊子  
石開奪刀將楊什長殺斃復聽從放火燒燬教堂實屬不法石開一犯前已比例擬辦該犯石開陽係石  
開之父雖係一家共犯惟事屬侵損應以凡人首從論查石開陽隨團打教營勇楊什長係被石開戮斃  
並非該犯殺傷自應比例問擬石開陽即石興受合比依兇惡棍徒糾聚商謀計圖得財放火故燒官民  
房屋已經燒燬搶奪財物者均照強盜律不分首從斬立決例擬斬立決王明堂當渝民糾團打教之時  
並未聽糾迫楊子青聲喊放火亦已畏累先逃惟其被誘同行在場聲喊助勢亦屬不合王明堂合依誘

稽同行者杖一百徒三年例擬杖一百徒三年到配折責充徒逸犯楊子青等獲日另結是否有當伏乞  
飭部議覆施行再該縣國璋前因羅元義屈殺流民多命當時辦理遷延經臣奏奉 諭旨革職欽遵  
在案查該縣國璋於拿獲羅元義石匯王明堂解省後復選勇役懸賞購線偵至黔省餘慶縣地方將要  
犯石開陽拿獲解省審辦是雖遷延於前尙知奮勉於後該縣平日官聲尙好所有花翎同知銜已革巴  
縣知縣國璋合無仰懇 天恩俯准隨案開復並免繳銀兩出自 逾格鴻慈得 旨覽○丙辰諭內外  
臣工章疏聲敘各省地名及臣下銜名等類均應全寫溯查乾隆嘉慶道光年間迭次欽奉 諭旨訓飭  
不准率行減省允宜永遠恪守乃近來奏疏往往任意減寫如科布多僅稱爲科塔爾巴哈臺僅稱爲塔  
吉林黑龍江熱河僅稱吉江之類不勝枚舉至烏魯木齊烏里雅蘇臺均稱爲烏里雅蘇臺無區別又如司  
道但稱某司某道府縣但稱某府某令殊失君前臣名之義本朝年號尤應敬謹全書如乾嘉道咸字樣  
私家著述偶有省文豈可登諸奏牘嗣後內外各衙門陳奏事件於年號地名人名等項務當全行書寫  
不得減文致乖體制將此通諭知之○是月日本國使臣鹽田三郎回國參贊棍山鼎介代辦使事

光緒八十三

臣朱壽朋敬編

臣潘鴻鼎恭校

五月丁巳朔准河南巡撫邊駿泉開缺調理○戊午夏至

上親詣行禮○以倪文

蔚爲河南巡撫○恭壽奏駐防之要練兵爲先治兵之法因時制宜查杭州滿營自光緒四年添練洋鎗隊一營先後奏准共兵四百名當經調署福州將軍古尼音布奏派統帶協領長志全營翼長協領柏梁管帶督同營總柏恆鳳魁哲爾精額並調撥綠營教習來營教練現經督飭該統領等逐日認真操練今將一切陣式操練精熟可期實用惟兵數過單恐遇防剿不敷調遣設能多練一兵似可多得一兵之用奴才再四思維悉心籌畫請將所練之兵酌定更番訓練之法卽以原領之款添練新兵擬八旗內再選精壯者四百名編入歸伍新陳合成八百之數卽照現定章程半陳半新輪流操練每月仍以四百名入操所有月支津貼發給現月入操之兵不入操者仍各頂值班如此辦理不獨兵既多練款無加增且陳練之兵不致日久生疲則新練之兵亦可日漸精熟實與差操均有裨益至添練之兵應需洋鎗藥由奴才咨商浙江撫臣於營後支應局舊存洋鎗撥用今既添練新兵操務較前繁重自應派員幫同辦理

查有管帶格林礮營總記名協領花翎止藍旗左領柏恆差操勤慎管轄嚴明堪以派充幫辦全營翼長事務仍令兼管格林礮隊以專責成至於所擬節餉練兵章程及一切吏番訓練之法奴才勉竭愚誠惟有督飭統帶各官實力講求勸加訓練務使一律精熟咸成勁旅報聞○己未以內閣學士洪鈞充出使俄國德國兼駐奧國和國欽差大臣大理寺卿劉瑞芬充出使英國法國兼義國比國欽差大臣直隸候補道李興銳賞加二品頂戴充出使日本國大臣○楊昌濬奏閩省前辦海防捐輸遞羅駐新嘉坡領事陳金鍾勸辦外埠閩粵各籍富商捐輸案內閩籍道員職銜吳進卿慷慨捐輸除照章核給正二品封典並請 賞戴花翎外尚有溢捐銀九百六十四兩零據稱願作報効不敢仰邀獎敘由陳金鍾代請另給匾額等情伏查吳進卿係福建漳州府海澄縣人久居外島乃能眷念梓鄉捐輸助餉洵屬深知大義所有溢捐未獎之銀將及千兩雖據稱不敢仰邀議敘究未便沒其向義之忱自應俯如所請由臣撰給匾額以示優異下所司知之○庚申岑毓英奏雲南僻處西南界連西藏緬甸越南南寧諸國近邊荒服歷代均以土司世守其地表華夷之限制為中國之屏蔽雖數百年來相沿不改而弱肉強食互相侵奪之禍幾於無時無之邊患多由於此前因裸黑山頭目張秉權僭佔猛猛土巡檢所屬圍控地方三十餘寨彼時臣正值帶兵出關經前撫臣張凱嵩會奏派員前往查辦臣隨即訪知裸黑山地方延袤一千數

百里外連緬甸北境葫蘆山等處內與緬威寧連思茅各屬屬犬牙相錯林深箐密烟瘴尤甚張秉樞所踞黑山上段大山之地縱橫七百餘里其黑山下段之地現爲石朝鳳石朝龍李芝隆等分踞互相雄長因擬用夷制夷之法將下段各獮目先行招撫以免張秉樞煽結爲患上年八月二十一日曾將派委知府王德誥參將尉遲東曉前往黑山招撫下段各獮目情形奏明在案並聲明招撫就緒可否給予土職再行請旨辦理茲據該委員等招撫就緒回省銷差並將黑山下段獮目李芝隆石朝鳳石朝龍之孫石光玉誠心歸順具結認繳各情稟由署雲南布政使史念祖會同署後局司道詳請具奏前來臣查黑山僻處遐荒向歸猛獮管轄自軍興後該獮目等仇殺相尋概難繩以法律今李芝隆等首先向化一經委員招撫遂即相率歸誠與張秉樞之始終怙惡者迥殊現查張秉樞已於上年八月被雷擊死其次子張登發相繼爲惡仍屢次攻佔猛獮土巡檢地方邊氓受害者不下數千家若不認真剿辦難免不日漸滋蔓句結緬越強敵爲患現值炎夏瘴癘正發難於用兵擬先行派兵防剿以守爲戰一俟秋高瘴退即選派得力鎮將酌帶兵勇分路進剿並諭令李芝隆石朝鳳石光玉各率土兵隨營効力得旨如所請行○主戌中法續議界務專約成其文曰按照光緒十一年四月二十七日由大清國大皇帝及大法民主國大總理爾天德各派官員親赴中國與北圻交界處所會同勘定界限業經



兩國大臣親自履勘竣事現經 大清國 大皇帝特派管理總理各國事務衙門多羅慶郡王總理各國事務衙門大臣工部左侍郎孫大法民主國大總理璽天德特派全權大臣下議院國會參議曾任吏部尚書駐劄中國京都總理本國事務恭將該處界務會商定議永遠遵守所有商定辦法開列如左

第一款 一將兩國勘界大臣之節略並所繪界圖均親自畫押者現在互相校閱各無異議 第二款 一其間有兩國勘界大臣意見不同之處及光緒十一年四月二十七日和約第三款末節所載改正之處照以下所開三條辦理 第三款 一廣東界務現經兩國勘界大臣勘定邊界之外芒街以東及東北一帶所有商輪未定之處均歸中國管轄至於海中各島照兩國勘界大臣所畫紅線向南接畫此線正過茶古社東邊山頭卽以該線爲界該線以東海中各島歸中國該線以西海中九頭山及各小島歸越南若有中國人民犯法逃往九頭等山按照光緒十二年三月二十二日和約第十七款由法國地方官訪查嚴拿交出 第四款 一滇越邊界第二段從小賭咒河南岸狗頭寨照圖上甲字起由狗頭寨自西直抵東計五十餘里北邊聚義社卽聚美社聚美社美肥社卽義肥社歸中國南邊有朋社歸越南至圖上乙字以從乙字至丙字亦由西抵東中越邊界路經二河其二河並歸一河入大賭咒河又名黑河從丙字往東南約十五里至丁字以北之南丹地方全歸中國從丁字往東北至猛喇下村卽圖上

戊字處按圖上所畫從丁字至戊字界線其南之南燈河漫美猛喇上村猛喇山猛喇中村猛喇下村全歸越南其北全歸中國從猛喇下村戊字起經清水河入大河之處卽圖上己字以河中爲界從己字至庚字以大河中爲界河西之船頭歸中國河東之偏馬寨歸越南從庚字往北至辛字經老臨坎至白石崖中越各有一半白石崖老臨坎以東歸越南以西歸中國山辛字往北順偏保卡北保中間入大河之小河東岸直往北至高馬白卽圖上壬字卽接第三段勘界大臣所畫定之處 第五款 一並越邊界第五段自龍膊寨雲南越南邊界經龍膊河到清水河入龍膊河之處爲止此處圖上甲字由此界自東北往西南至綿水灣入賽江河之處爲止卽圖上乙字按現畫界則清水河綿水灣河歸中國自乙字由東直抵西遇藤條江在大樹腳以南爲止此段界線以南歸越南以北歸中國卽圖上丙字自丙字處起到金子河入藤條江之處爲止以河中爲界卽圖上丁字從丁字起經金子河計程三十餘里又由東至西抵圖上戊字處此界過在猛蚌渡以東入黑江之小河卽圖上己字從戊字至己字以河中爲界從己字往西以黑江之河中爲界照兩國勘界大臣畫定界圖並照以上所畫界線由 大清國地方官及大法民主國欽派駐越大臣遴派官員前往會同辦理安設界牌事宜現畫定界圖二分每分三張乃兩國欽差大臣畫押用印者圖上新界以紅線爲界雲南界圖並註有法國同等字中國甲等字以便易於

識認○中法續議商務專約成其文曰 大清國 大皇帝大法民主國大伯理璽天德彼此欲令兩國通商來往倍加興盛又欲將光緒十二年三月二十二日天津所定和約彼此保固切實施行酌定續約商改數款爲此兩國特派全權大臣會同辦理 大清國 大皇帝特派管理總理各國事務衙門多羅慶郡王總理各國事務衙門大臣工部左侍郎孫大法民主國大伯理璽天德特派全權大臣下議院國會參議曾任吏部尙書駐劄中國京都總理本國事務恭各將所奉全權文憑互相校閱妥協立定條約如左 第一款 除今約所改之款外光緒十二年三月二十二日在天津所定之和約換約後仍卽逐款切實施行 第二款 按照光緒十二年三月二十二日所定和約第一款兩國指定通商處所廣西則開龍州雲南則開蒙自緣因蠻耗係保勝至蒙自水道必由之處所以中國允開該處通商與龍州蒙自無異又允法國任派在蒙自法國領事官屬下一員在蠻耗駐紮 第三款 現因中國北圻來往商務必須設法作速振興所有光緒十二年三月二十二日和約第六七款內所訂稅則今暫行改定凡由北圻入中國滇粵通商處所之洋貨卽按照中國通商海關稅減十分之三收納正稅其出口至北圻之中國土貨卽按照中國通商海關稅則減十分之四收納正稅 第四款 中國土貨按照光緒十二年三月二十二日和約十一款第一節完納進口稅後過北圻到越南海口者除中國之外如係前往他國

則出口之時應照法越稅則納出口之稅 第五款 中國允准中國土藥由陸路邊界出口入北圻此土藥應完納出口正稅銀貳拾兩一擔法國人及法國保護之人只能在龍州蒙自蠻耗三處可以購買此項土藥中國商人所應納內地釐金等費亦不過貳拾兩一擔之數中國商人由內地運土藥者將此土藥交與所買之人時即與收釐憑單而所買土藥之人完納出口稅時將憑單到關呈驗繳銷再此項土藥不許由陸路邊界通商海口再入中國作為復進口之物 第六款 除兵船及運載兵丁軍械之船外所有法國及北圻船隻從諒山至高平復由高平至諒山經過龍州至高平並高平至龍州之河此項船隻每次路過即每噸納鈔銀五分惟船內所載貨物一概免稅運入中國貨物可用此二河其貨物並可用旱路及諒山至龍州之官道俟中國在邊界設關之時此項經過陸路之貨物在龍州必須完稅後方准銷售 第七款 日後若中國因中國南境西南境之事與最優待之友國立定通商交涉之和約條款章程等類所有無論何等益處及所有通商利益施於該友國此等約一施行則法國無庸再議無不一體照辦 第八款 右各條經會同商定後 大清國 欽派王大臣及大法民主國欽派大臣將此約條款原文譯出漢字書押用印二分 第九款 此次續約並光緒十二年三月二十二日通商和約經兩國 欽差王大臣互換後此續約與該通商和約並載一體施行 第十款 此約現由 大

清國 大皇帝批准及大法民主國大伯理嚕天德批准後卽在中國京城互換○岑毓英奏雲南猓黑頭目張秉樞勾結蠻衆攻據猛猛土巡檢所屬圍控地方擄掠燒殺勢甚披猖業經臣與前撫臣張凱嵩將剿辦情形先後奏明在案詎意猓匪狡誦異常見官軍進攻則深匿不出詭詞乞撫而實則仍勾黨與恃險負隅比因西南防務喫緊姑示羈縻迨張秉樞於上年八月間被雷擊死後其子張登發尤爲兇惡復屢次攻占猛猛邊地擄害不堪疊據順甯府及緬甸文武地方官先後稟報並據應興猛猛土官罕肅封稟請發兵剿辦復經臣添派參將侯應賢管帶順雲協操兵並飭參將禹光廷等挑招順甯雲州緬甸土勇五營游擊李春陽募募東緬土勇兩營千總刀煥彩募鎮沅緬土勇兩營參將尉遲東曉募威遠屬屬猛烘猛班猛受各地方土勇七百名分紮要隘相機進剿以期殲除猓匪俾安邊界報聞○張之洞奏廣東香港六廠山總稅務司赫德代征有損無益請飭停止得 旨該衙門議奏○癸亥諭軍機大臣等中法續訂界務商務條約已派王大臣與法使畫押所有照繪欽州界圖及照錄條約各件卽日由總理衙門發交委員馬復齋攜回其設立界牌事宜照約由地方會同駐越法員辦理鄧承修著卽馳驛回京○唐炯奏礦務事體繁重兼以庫帑出納亟須策畫力始免貽誤查有海防先候選知縣濮文曦深通化學諳習開辦礦事宜該員現在京候選四川機器局委員巡檢商啟文精於製造機器該員曾經

已故督臣丁寶楨奏保四川越巂同知鄧林明晰鈎稽績鼓鑄該員籍隸江西現已告病開缺回籍  
仰懇 天恩飭下吏部及四川江西督撫臣飭令該員等迅速來滇聽 臣差遣用資臂助 上諭唐炯奏  
請調員辦理礦務等語候選知縣濮文曦四川機器局委員巡檢高啟文前四川越巂同知鄧林著吏  
部及四川總督江西巡撫飭令該員迅赴雲南交唐炯差遣委用○裕祿等奏湖北設局鼓鑄業經 臣等  
酌議章程奏明開辦在案茲據寶武局司道詳稱該局所司銅鉛必須循環辦理從前購自滇黔向無應  
完稅項現因內地來路短少改購外洋銅鉛委員由滬運鄂核計價值運腳成本已屬不輕若再照商運  
完稅勢必耗本愈多補注愈難近時戶部採購東洋銅斤經過各關並未收稅外省購辦鼓鑄銅鉛事同  
一律自應詳請奏明立案免完關稅以輕成本以資周轉等情前來 臣等伏查銅鉛為鼓鑄要需現用購  
運成本係動自帑項且事關規復國法舊制亦與別項採辦不同相應奏明請 旨飭部立案將鄂省採  
辦鼓鑄銅鉛由滬運鄂經過江海關准予查驗放行免完關稅仍由 臣等按批發給護照注明斤數並咨  
請南洋大臣行知關道認真稽查如於照外有夾帶走私情弊即由該關道照章查拿罰辦以昭核實得  
旨如所請行○甲子調明魁為乍浦副都統以連慶為正白旗蒙古副都統○乙丑以烏拉布署鑲白  
旗蒙古副都統○諭戴遷等奏請飭追欠款一摺據稱承修各項要工前經奏撥直隸藩庫銀二萬兩僅

領到銀一萬兩現在工未修竣待款甚殷懇飭籌撥等語著李鴻章飭令藩司迅將欠發銀一萬兩如數撥給以應要需另片奏前撥直隸旗租項下銀一萬兩尙欠解五千兩請旨飭催等語並著李鴻章飭司籌撥○丙寅諭軍機大臣等中法續訂界務商務條約已令總理各國事務衙門王大臣與法使恭思當畫押所有條約照會各件不日由總理衙門咨行該督撫查照辦理滇省界務周德潤與法使狄隆會勘時意見未合歸入請示者兩段此次定議經總理衙門與周德潤按圖面商據稱猛梭猛賴一段荒遠瘴癘葉之不足惜岑毓英所見相同至我所必爭者南丹山以北馬白關以南其中山川險峻田疇沃美如能劃歸中國既可固我疆圉亦可兼收地利當經總理各國事務王大臣與法使恭思當反覆辨論將猛梭猛賴一段准歸越界其南丹山以北西至狗頭寨東至清水河一帶地方均歸中國管轄約計收回各地段不下方四百餘里此事熟費唇舌始克就我範圍所有各該處界址應照約按圖由地方官會同駐越之法員申劃清楚設立界牌其餘善後各事宜屯田應如何興辦防兵應如何分戍該督撫務當詳細籌商次第經理界務既定即須接辦商務岑毓英前奏布置邊防摺內有蒙自爲通商要津之語現准蒙自設立領事開辦通商正相脗合至糧耗係保勝至蒙自水道必由之路准其分設領事屬員與中國分設之稅司互相稽察現經議定蒙自設立領事官時必於數月之前先期照會以便駐紮關道安設稅司

粵省以龍州開闢請設太平歸順道一員駐紮該處雲南事同一律著該督撫趁此尚未開辦之時悉心  
布置奏明辦理至滇之士藥盤金向來徵收甚微現定每百斤稅盤各收銀二十兩必須完過盤銀後方  
准法商完稅接買將來於課項亦有裨益總之界務商務總理各國事務王大臣所定條約其大綱此  
外節目周詳施行盡利全在該督撫隨時規畫用人得當一切慎之於始免致別生枝節是爲至要將此  
由五百里各諭令知之○諭御史慶祥奏八旗置買房地納稅未能劃一請量爲變通一摺著戶部議奏  
○譚鍾麟等奏西甯所屬番族黃河以北惟剛咱族爲最大黃河以南則上下魯倉族爲最大其餘種類  
不一如阿粗平等族本係野番以搶劫爲生附近熟番屢次受其禍害此次戕害弁兵勢不能不嚴切懲  
辦特以前阻雪山地僻而深行軍運糧道路險絕人馬皆仄足而行瘴癘熏蒸入秋尤甚且慮該匪西竄  
川番界內則越境剿辦恐無了期臣鍾麟當飭方鼎錕鄒連捷等相機剿撫慎重前進並傳諭魯倉千戶  
魯本科於阿粗平等番匪經過時倉責成該千戶截阻毋令西竄魯本科深明大義與百戶方耶率馬隊  
數百名沿途阻截故官軍一戰而匪就戮餘衆安撫魯本科不爲無功臣鍾麟與臣福裕咨商撥派魯本  
科爲總管河南番族千戶阿粗乎四族現設百戶四名由貴德麟給予執照俟三年後管束嚴密再由青  
海衙門換給百戶執照歸完受寺千戶管束而統轄於魯本科以資鈐制每年酌量賞給魯本科倉斗青



稞十八石百戶方郎每年賞給倉斗青稞八石完受寺千戶阿剛每年賞給倉斗青稞十石均由貴德所存番屯糧內支給俾令隨時約束番族以專責成其迭禪寺噶爾且錫勒圖呼圖克圖及完受寺番僧恰爾蓋二名素爲番族信服此次辦理收撫甚爲得力應如何獎勵之處請 旨飭下理藩院從優議敘庶四族聽其約束不致滋事亦綏靖邊圉之道也得 旨如所請行○譚鍾麟等奏查去年六月拿辦貴德阿粗平等四族野番殲斃首犯餘衆就撫各營將士實屬異常出力經 臣鍾麟會同前西甯辦事大臣李慎奏乞 恩施擇尤爲出力者每營酌保數員欽奉 上諭覽奏已悉仍著將善後事宜辦理妥善等因欽此欽遵分別查照在案 臣福裕履任後據各營開送酌保員弁清單前來因到任未久咨商 臣鍾麟以各營所保太多將原冊發還核減每營祇准保獎數員旋由營務處方鼎錫等彙齊清單履歷 臣等覆核尙無冒濫查此次番匪搶掠斃兵刦犯戕官屢經諭令獻出首惡抗不遵照經 臣鍾麟派李良穆率沈福田馬安良等六營遏其東竄崔偉王振德劉可舜馬步三營扼其西竄番果洛克之路鄭連拔率馬步四營與貴德同知張大鏞帶土勇數百名由中路進攻委西甯道方鼎錫總理營務就近調度並派員分司轉運以濟三路軍食該匪以雲山爲巢穴初踞高紅崖恃險抗拒鄭連拔等率衆掩擊退踞龍王池經李良穆派隊斷其雲山小道該匪西竄忙拉水川其地巉崖巨壑林深箐密意欲誘我軍深入斷絕歸路鄭

連拔等飭魯倉千戶魯本科持諭前往開導令其縛獲首犯卽免剿辦乃該匪愚險負固我軍猝至開放鎗礮崔偉等分路進剿陣斬首逆悍匪數千名帶傷者數十名餘眾越嶺奔逃我軍亦陣亡參將一員兵勇六名帶傷數十名此六月二十二日攻剿獲勝情形也該四族番匪經此痛剿畏罪投誠懇求受寺番僧十戶等率領頭目投營乞撫自矢永不爲匪當由鄧連拔王振德張大鏞等散給牛羊馬匹准其插帳游牧並令四族各舉番目一人爲百戶給以執照俾資約束自去秋以來不獨該四族安居樂業卽他番亦不聞有搶劫之案黃河以南蒙古各處一律安靜所有在事出力之西甯道方鼎錄總辦營務調度有方擬請遇有應升缺出請 旨簡放記名提督恩奏總兵著西甯鎮總兵鄭連拔擬請 賞加頭品頂戴署河南鎮總兵提督李良穆擬請交部從優議敘提督崔偉擬請 賞加頭品頂戴總兵沈福田擬請以提督記名 簡放總兵銜留陝甘儘先補用副將王振德擬請以總兵儘先補用儘先升用知府甘肅貴德同知張大鏞擬請以知府儘先卽補並 賞加鹽運使銜其餘出力員弁另繕清單仰懇 天恩飭部照請獎敘以示鼓勵下部議奏○己巳諭剛毅奏肅短交代各員分別參追一摺暫行革職之前山西神池縣知縣孫國恩已革和順縣知縣夏肇鼎已故汾陽縣知縣朱安國前在各任內虧短正雜各款銀兩爲數甚鉅參追復逾限未繳實屬玩延孫國恩朱安國均著卽行革職孫國恩與夏肇鼎一併監追並將

該三員寓所資財先行查抄一面提集經手書差人等嚴訊是使是挪分別辦理並著順天府府尹浙江巡撫將各該員原籍家產一併查抄備抵興縣知縣王毓雯前因虧欠米穀業經革職查抄現據奏稱該員虧短銀兩延不完繳卽著併案嚴追以重庫款○平未雲南提督黃武賢休致仍賞食全俸○諭卞寶第奏拿獲謀殺人犯正法一摺據稱本年三月間訪聞武陵縣屋瓦墻地方有外來會匪陰謀爲逆結黨甚衆當卽知照署提督李勝派撥將弁會同該府縣上緊查拿旋據該縣知縣及提標弁兵馳往該處起有僞示暨刀矛火藥拿獲要匪鍾業章李發兒周旺生周家銀等正法並據都司申大發將首犯龍老九拿獲解省供稱與周旺生楊金幅鍾業章周銀亭趙美世匠並梁么兒李光燮等糾合黨與多人約期起事已於訊供後將該犯卽行正法等語匪徒聚衆謀逆實屬罪不容誅業經先後殲除辦理尙爲迅速逸犯楊金幅等仍著飭屬一體嚴拿務獲究辦以淨根株出力之都司申大發著交部照例核給獎敘○壬申遣杭州副都統恭壽致祭禹陵○曾國荃奏江陰南岸黃山舊礮臺原設八十磅子克虜伯後膛銅礮四尊前因該處建築八百磅子極新洋式大礮明室用將該四尊礮位拆下另擬於就近大石灣明臺八門左右添築四門以資安置祇因上年起辦洋式大礮明臺工務紛繁未遑並及惟多安一礮卽多得一礮之用現在前項洋式礮臺大工將竣飭據統領明春武毅等營蘇松鎮總兵張景春勘估此次大石灣

添築礮臺四門工程若乘此接續興辦一氣呵成可期事半功倍所需工料經費格外力求撙節約共需銀一萬兩有奇又該營所儲一百二十磅田礮礮制作精良最爲設防利器惟須於江面設靶操演嫺熟臨事始益有把握並擬於大石灣一帶擇地建造礮房一所各築三合土垛牆一道將礮位妥爲安置以免不時挽運致易損壞約計亦需經費銀五百兩左右以上兩項經費將來均著於八百磅子洋式大礮明堂用欸案內一併核銷以昭核實據籌防局司道詳請奏咨立案前來臣查所估經費甚屬撙節自應准其照辦以期江防益臻鞏固得旨該衙門知道○甲戌以馮子材爲雲南提督○謙禧奏前因漏網逆首楊步雲復在平泉州等處糾眾滋擾經奴才飛派駐防練兵前往會同各路官軍蒙員剿捕一面據情奏奉硃批知道了即著飭令派出員升會同地方文武將首犯楊步雲及該匪黨悉數捕獲毋任漏網以靖地方欽此欽遵正在轉飭遵照間即據管帶熱河練軍佐領全齡管帶百北口練軍參將張錫祿稟送中途搜獲楊步雲派探匪目李殿沅即李三缺牙一名解經奴才督率理刑司員提訊該犯供認在楊步雲夥內分充頭目隨同各處搶劫現在楊步雲聞官兵眾多率眾赴撒拉巴營子邀添夥黨再行拒敵分伊先來查探等情屬實當經照章卽行就地正法一面嚴定賞罰通飭地方文武各員合力兜拿楊步雲務獲毋再任令漏網去後茲據佐領全齡參將張錫祿八滿參將春福先後稟稱探得逆首楊步雲

現在糾添夥黨二百餘人在撒拉巴營子盤踞並於該處路口設立礮臺以備抗拒全齡春福張錫祿等  
訓督帶兵官練軍嚴整隊伍前往剿捕聞四月二十七日行至撒拉巴營子查看該處四面皆山地極險  
要設立礮臺守甚嚴密正欲整隊深入忽聞礮臺火礮齊發賊匪蜂擁而出膽敢依山列陣抗拒施放鎗  
礮勢甚猖獗我兵不能仰攻佐領全齡飭弁帶兵分路進攻自引勁旅奪路繞出賊後張錫祿亦飭哨官  
馮服宮等直擊中堅哨長岳魁龍與各路官軍眾弁分作東西兩翼四面夾攻鎗礮齊施賊腹背受敵猶  
復拚命死拒忽礮火延燃賊巢火礮猛烈賊陣驚動我軍勇氣百倍鼓勵前隊奮往直前鎗刀並進該逆  
等勢不能支紛紛逃竄官軍督隊追逐各匪紛紛逃逸計鎗斃逆匪十餘名陣亡三十餘名被傷者不計  
其數搜擒逆目一名逆匪九名奪獲火礮十餘桿馬匹器械衣服無算共燬賊巢二十餘座馬棚七八間  
刨平礮臺一座因查楊步雲逃遁無獲先將獲犯就近解交平泉署看守全齡等會同官兵眾弁等到處  
搜捕至五月初二日訪知楊步雲在不泉州屬之老虎溝盤踞是日全齡督隊同各路官兵山該處東北  
進捕張錫祿亦派弁兵同眾弁等中西南兜拿該逆猝被圍捕倉皇失措猶敢騎馬放鎗抗拒左右衝突  
經哨長壽祥等趕往首先擒獲各等情稟報並由佐領全齡飭派防禦福勒敦將逆首楊步雲夥匪李才  
馬川輪寶城得馬幅周振祥陳富堂楊林李幅卽三沒牙張景和李鳳林押解前來當經奴才卷查光緒

十年二月間楊步雲聚眾在建昌縣地方滋擾拒敵官兵奏 諭旨嚴拿務獲在案隨督率理刑司員刑部員外郎陶璠主事蔡揆忠熱河道德克精額承德府知府廷杰提訊各犯供甚狡展連日研鞫始據楊步雲供認伊籍隸山東東昌府向在朝陽縣游蕩度日同治十三年因仇殺孫汰犯案脫逃至光緒十年在建昌縣扎蘭營子捆人勒贖拒敵官兵敗逃往瀋陽一帶避匿去冬潛回轉山子地方存身因挾社首冉申元報縣緝捕之仇於本年三月間邀允在逃之李鳳林于洛邦先獲正法之李殿沅現獲之葛川輪賈城得李才楊林李鳳林等彼此輾轉糾邀捕脅共有一百餘人皆記不清姓名大家推伊爲總頭目伊派王城德作先鋒派李鳳林于洛邦李殿沅等各帶夥黨二三十人充作散頭目四月間在扎蘭營子聚齊執有大旗兩桿上書代天行化殺富濟貧各四字分攜洋鎗鐵礮刀械各騎馬匹於四月初五日行劫興隆溝事主冉申元家牛驢衣服等物捉其姪冉發勒贖得贓嗣又率領于洛邦等夥劫伊姪等家財物分用正欲赴三官營子孫林家搶劫適聞得官兵前往剿捕伊慮人少難敵故即派李殿沅查探官兵自向各處邀添舊夥統共二百餘人在撒拉巴營子盤踞即於路口設立礮臺以擊官兵閏四月二十七日官兵追及經伊夥佈陣拒敵敗散伊即騎馬攜帶洋鎗逃往老虎溝藏匿至五月初二日被官兵圍捕伊猝不及防放鎗拒捕並未傷人即被擒獲賈之楊林李鳳林葛川輪賈城得李才竄供如一核與前訊

李殿沅供亦相符似無遁飾惟陳富堂張景和周振詳李幅卽三沒牙馬幅同供伊等均係被脅勉從或僅爲賊偵探或僅容留逸賊或僅爲賊餵馬或僅與賊賭博並未隨同搜劫財物亦未拒捕傷人自應另行核辦奴才查逆首楊步雲始則糾邀多匪拒敵官兵已屬罪大惡極茲復糾合黨與豎旗滋事各有僞號形同叛逆實屬罪不容誅現既訊取確供本應解京審辦祇因逆黨甚盛長途遞解在在堪虞是以於訊明後與爲從之楊林李鳳林葛川輪賈城得李才均照章卽行就地正法並傳首犯事地方懸桿示衆以昭炯戒而快人心其被脅勉從之陳富堂張景和周振詳李幅卽三沒牙馬幅卽交承德府審辦此股逆匪內各有奉天省已革兵丁經官兵擊敗後各匪均向東荒逃逸緣東荒毗連奉省諒欲遁歸舊巢現飛咨盛京將軍轉飭一體堵拿並飛飭佐領全齡暨地方文武合力搜捕上諭謙福奏拿獲積年巨匪請將出力員弁獎勵各摺片匪首楊步雲前在熱河建昌縣等處糾衆滋事當飭熱河都統等派兵緝捕久未弋獲茲據奏稱本年四月間楊步雲復糾合黨與在掃拉巴營子地方建築礮臺豎旗滋事當派佐領全齡參將張錫祿春福督帶官兵練軍前往搜捕該匪黨等膽敢列陣抗拒勢甚猖獗全齡等督兵分路進攻擊斃逆匪數十名餘黨紛紛逃匿五月初二日在平泉州屬老虎溝將楊步雲擒獲並將匪黨李才等一併拿獲當於訊明後卽行正法等語楊步雲以積年漏網巨匪久稽顯戮此次經謙福嚴飭

將并合力兜攔立除巨夥辦理尙屬認真在事出力各員并著准其擇尤保獎毋稍冒濫其餘在逃匪黨仍著該都統會同盛京將軍飭屬一律嚴拿務期盡絕根株毋留餘孽○乙亥欽奉 慈禧端佑康頤昭豫莊誠皇太后懿旨醇親王奕譞之第七子著命名載瀾○唐炯奏 臣於閏四月初一日到雲南省城連日會商督 臣岑毓英署藩司史念祖查詢招商局知府全林續辦情形現已起運七起二批京銅五十萬冬間能否再運八起頭批尙未可定伏查滇省舊有銅廠三十餘處年出銅斤四十萬軍興停辦已數十年如果川湯丹等廠銅雖老而山不空此外曲靖昭通及毗連四川會理等處未開之廠尙復不少而招商局兩年僅能起運京銅三批辦理艱難拮据如此推求其故大約有二一則庫帑支絀商本不厚從前開辦皆係川湖江廣大商巨賈每開一廠率銀十萬二十萬兩不等其時各延礦師能識地脈之衰旺引路之淺深結堂之大小礦質之佳劣相度既定然後施工一經開成歷數十年取用不竭又能煎煉得訣分汁甚易故獲利既厚招徠愈多卽有折虧亦亦中止自軍興後此等礦師死亡殆盡現在招商局商股僅七萬餘兩承領帑本止十一二萬兩勉顧京運卽無餘力開辦新山不過就舊有之老廠洗滌淘洗零星湊集間或開辦子廠又因山深炭遠搬運維艱甚或礦不分汁剛柔不和既無礦師調維但只任憑運氣絕少把握難望有成一則缺少砂丁人力不足開鑿皆運悉賴人工從前大廠率七八萬人小廠亦



萬餘人合計通省廠丁無慮數百萬皆各省窮民來廠謀食今則停辦太久廠利不豐外省民無所歸本省丁口零落雖經招募來者甚稀凡此皆辦理艱難拮据之實在情形也竊以招商局設立三年招股甚非固因近年股票倒騰亦由前撫臣創設五金局雖欲官理民財其勢不能相信以是來源日絀辦理尤難督臣旋省後商同司道會將五金局奏明裁撤今臣又將招商各分局或撤或留酌加整頓臣前在藩司任內深知滇民瘠苦除開廠更無生路會條議開廠章程以招集商股購辦機器為兩大端蓋非商股不能輔官本之不足非機器不能濟人力之窮及任巡撫曾議礦務仍持此議今奉 命來滇督辦博訪周咨體察情形舍此別無久遠長策現擬招股一事則專委天順祥商號四品銜候選同知王熾等分赴川廣漢口寧波上海等處招股其招集之法則取照商規以出股之多寡管廠事之重輕周年六釐行息三年結算再分紅利皆於天順祥商號憑摺支取三年後即准提本其願自攜巨本來滇開辦不入股分者亦聽其便至機器一事查日本自變用西法以來一切製造皆用本國之人先望雲氣次驗水土石三項相符然後相度應用何等機器次第施工故能確有把握現擬先聘東洋礦師俟其到滇察看形勢應用何等機器即行購辦庶免虛糜工本仰懇 敕下出使日本大臣轉飭隨員候選知縣于德琳代聘東洋上等礦師二人議定三年即令于德琳伴送由四川敘州府入滇于德琳通曉東洋言語於開辦鑛務

事宜亦頗講求以之伴送沿途既便照料到渝亦易任使惟是機器須礦師議購招股非旦夕可成輾轉需時豈堪坐待仍當一面督飭招商局知府全林續就現有資本盡力開採并廣諭紳民查廠試辦以憑採買斷不敢耽延致誤京運抑更有請者自來久大之規不能猝辦況當此時勢艱難庫帑支絀滇民凋敝商信未孚措手極爲不易聖主高厚再生之恩榮服錄用何敢不盡心竭力任勞任怨尙求皇上假以歲月部臣寬以文法但責其有成不期以速效庶得勉竭駑庸仰答鴻慈於萬一得旨覽奏均悉已電諭徐承祖照辦餘依議○內子諭慶格等奏查勘昭陵月牙城牆應修工程請飭擇吉興修一摺著欽天監於本年五六月內選擇吉期先行知照即著盛京將軍會同工部侍郎屆期敬謹興修○戊寅楊昌溶奏查定例文武官紳陣亡殉難者分別議給騎都尉雲騎尉世職襲次完時給予恩騎尉世襲罔替又世職年未及歲者先將宗圖冊結具題奉旨准其承襲後給予半俸俟至十八歲時補送引見各等語細釋例意既有年未及歲之條自應隨時請襲方爲正辦無如軍興以後各處請卹之案紛至沓來該難裔等因家室被毀遷流在外一時未能請襲者固不乏人而不肯書吏乘採訪之便將已故官紳藉口隨同官兵堵禦陣亡朦混請卹漁利者亦所不免現在承平已久從前卹案竟有遲至數十年始行出賜者不特與例未符且年遠事湮真僞難辨紛紜告訐流弊滋多雖經飭行州縣認

真查核取給如有詐冒照例嚴辦無奈人多案雜查不勝查卽以福建一省而論今在標世職已有三百五十餘員每年由司支領全俸約需實銀二萬有奇而綜核准卹各案其中未歿者尙十有七八若不請立期限不但陳陳相因愈久愈難稽考而經費維艱必至無款可支向隅同抱在真正世職被其擁擠永無補缺之日而撫越頂冒等輩均屬有乖倫紀既不能孝焉望能忠似此魚目混珠虛糜俸餉其非朝廷優卹盡臣作養人才之意該難商等如果情真事實亦斷無及歲以後尙甘自外生成者應請旨飭部議立專條凡承襲各項世職分別酌定年限以杜冒濫逾限不襲卽行註銷其候補世職亦應明定限制以期疏通嗣後閩省擬以三百六十名爲定額餘作額外仍支半俸俟額內世職補缺革故再將額外世職按次收標至在標學習期滿及歲世職仍申明舊章以報滿之日起限三年內請考給咨無故逾限不到卽將收標飭退不准再行請考收標如此明定期限庶體卹之中仍寓核實之意不致漫無區別卽此項候補人員亦不致於擁擠矣下部議奏○庚辰 上詣 大高殿祈雨○欽奉 慈禧端佑康頤昭豫莊誠皇太后懿旨皇帝大婚時所需欵項理宜預爲籌備著戶部速撥銀二百萬兩解交大婚禮儀處敬謹恭辦○興修京師衍聖公府○諭嵩山奏保定城守尉挑送驍騎校官缺與該處防禦呈稟兩歧請行辦理一摺著李鴻章秉公確查據實具奏○癸未雨○劉錦棠奏新疆初設行省官制未備所有撫

臣衙門筆帖式員缺尚未議設遇有滿蒙文件雖暫委員繙譯究與定例不符茲新疆布政使魏光燾詳  
稱查定例各營撫衙門筆帖式由京補用六年期滿各該處註考送部以京缺補用又例載直隸雲南總  
督衙門筆帖式各一人陝甘四川總督衙門筆帖式各二人山西巡撫衙門筆帖式二人陝西巡撫衙門  
筆帖式一人各等語新疆地處極邊所屬土爾扈特和碩特及哈密回部亦時有往來文件繙譯較多擬  
請仿照山西巡撫衙門筆帖式之例添設新疆巡撫衙門筆帖式二員掌理繙譯其俸銀照品支給養廉  
一項查新疆道遠地瘠百物昂貴擬請從優照陝甘總督衙門筆帖式之例每員歲支銀二百五十兩並  
照甘肅津貼公費章程每員歲給公費銀六百兩以資辦公等情詳請具奏前來臣覆核無異合無仰懇  
天恩俯念繙譯事關重要 准予添設新疆撫臣衙門筆帖式二員並請 飭下部院核議補放以符  
定制下所司議奏○劉錦棠奏查喀喇沙爾庫爾喀喇烏蘇辦事領隊大臣各員缺前經奉 旨裁撤並  
准設喀喇沙爾庫爾喀喇烏蘇直隸撫民同知各一員加理事銜管理地方戶籍田賦刑案兼管土爾扈  
特游牧事宜各在案是土爾扈特等蒙眾向隸辦事領隊管轄者自應改歸地方官管轄第事屬創始誠  
恐各蒙民未能戶曉遇有交涉事件辦理仍多窒礙相應請 旨飭下理藩院申明新設定制轉行各該  
蒙部一體遵照以資治理至哈密總辦回曾經前督臣左宗棠援照吐魯番例奏歸哈密通判兼管一切

案件由官審報應請 勅部仿照吐魯番同知之例改鑄哈密通判兼管理回民事務關防一顆頒發領用以專責成仍由 臣督飭各該地方凡遇事秉公辦理俾蒙漢繹回一體相安以仰副 朝廷綏靖邊防之至意下所司知之○乙酉戶部奏光緒十三年四月二十日軍機處交出軍機大臣面奉 諭旨御史胡俊章奏州縣交代請飭部定章責成道府督催等語著戶部議奏欽此欽遵將原奏一併鈔交到部據原奏內稱查州縣虧空近有二等一係病故之員一係參劾之員迨至查抄萬不抵一道府爲州縣親臨上司果能於上下兩忙後及一歲之中將所屬州縣應解正雜一切款項應留支者准其留支外其餘必勒限一月掃數解司否則由道府詳參州縣虧空該上司例應分成代賠請飭定章通行等語臣等查州縣虧空錢糧雍正年間欽奉 諭旨酌定條例分別治罪乾隆年間疊奉 上諭嚴切申警誠以貪不懲則奸不止法不立則令不行故凡遇虧空之案無不立辦且無不重辦當時大小官吏洗手奉公倉庫正供絲毫無欺職是故也數十年來軍務倥傯仕途淆雜 朝廷崇尚寬大而巧官因緣爲奸遂致錢糧正款視如私錢任意虧挪若已革已故之員其本人家屬皆拏一查抄之名將庫款有意席捲假作虧空充爲近來惡習各該上司曲爲彌縫往往虧空者不卽參劾而參劾者多已故已革之員迨至查抄萬不抵一甚且以查無其人公然登諸奏摺而 國帑竟歸無著矣 臣等以爲與其懲於事後何如防於事先故

於光緒十年奏定新章各州縣於上下忙徵完時將應解一切正雜款項儘數解司該管道府直隸州親赴屬庫核對盤驗查明的數出具甘結送部較之舊例更為嚴密各省督撫亦力加振作參奏之案比比皆是今該御史請將州縣正雜款項除留支外勒限一月掃數解司否卽由道府詳參其意爲杜絕徵存不解起見與部前定新章實相表裏各道府州果能平時考查催提俾屬庫一無久存不解之項彼已革已故者自無從施其伎倆至所稱該上司例應分成代賠請飭定章一節查州縣虧空本有知府分賠之條道光七年欽奉 上諭嗣後各州縣虧空銀米被參後先在本犯及家屬名下照例按限催追如限滿完不足數查明家產盡絕實在不能追繳者卽將未完數目作爲十成無論原案是侵是挪俱著不行揭報之知府直隸州知州分賠五成勒限追繳其餘五成著失察之道員分賠二成藩司分賠二成督撫分賠一成均照代賠例限按銀數多寡分年完繳倘有兩案准將前案銀兩依限清完後再行接續追繳至從前已參未結各案亦照此分別核賠等因欽此立法周詳似無可再議惟功令雖嚴而奉行不力且臣部則例屢經修改不免前後參差臣等公同商酌擬請明發 諭旨飭下各直省督撫嗣後州縣正雜錢糧稅課務須隨徵隨解其一切應解款項亦必隨時解司不准稽延並於上下兩忙各截數後限一月內解清倘有已徵未解立即撤參並責令本管道府直隸州親赴屬庫盤查核對加結申詳將來如有虧

空卽將道府直隸州照盤查不實例議處一面於本員名下勒限著追如完不足數卽按所虧之數分作十成該管知府直隸州分賠五成出結之道員分賠二成失察之藩司分賠二成督撫分賠一成以示懲儆其有扶同徇隱者弊在知府直隸州則令知府直隸州獨賠弊在各上司則令各上司加倍罰賠仍均照例議處又查吏部處分則例內載督撫題參州縣虧空卽於疏內將該管上司應否分賠之處一併查明具題若不聲明者降三級調用公罪等語應令嗣後各督撫奏參州縣虧空卽隨案陳明如虧短之州縣將來無力完交或交不足數凡應行分賠之該管各上司職名一併隨摺開明以免日久推延易爲查考倘再漏未聲敘臣部卽照吏部處分則例奏參如蒙 俞允並請 明諭通飭遵行至臣部則例中參差各條容 臣陸續奏明更正以期畫一 上諭前據御史胡俊章奏州縣交代請飭部定章責成道府督催等語當令戶部議奏茲據該部酌核定議所稱盤庫加結分成罰賠及題參摺內聲明該管上司應行分賠各節舊例新章本極周密乃各該省奉行不力甚至設法彌縫所有虧空州縣直至已故已革始行參劾此等積習殊堪痛恨嗣後各督撫辦理交代之案卽著遵照部議督飭藩司及該管道府直隸州隨時實力嚴查如各該上司有心容隱並不揭報卽行據實奏參著落賠繳分別議處總之立法雖善尤在用人各直省督撫均當慎選良吏儉以養廉務期下不擾民上不虧帑以重庫欸而除積弊將此通諭知

之

六月丁未朔以京師得雨 上親詣 大高殿報謝○予故臺澎副將張東麓等二十八人照軍營病故例從優議卹○恭錄等奏查黑龍江通省常川練軍例操需用洋藥銅帽等項經前任將軍豐紳文緒奏請均由天津機器局按年領取各在案茲准直隸督臣李鴻章咨開據天津機器局詳稱札奉海軍衙門議奏東三省演練軍火除奉天省所需常操銅帽鉛丸火藥仍由神機營核發外其吉林黑龍江所需銅帽拉火等項擬由就近吉林機器局自行製造領用上年奉部核裁經費現造火藥較難接濟外省倘黑龍江仍須由津領用藥帽子彈等件可否照數撥還價值俾資周轉而清界限等因前來奴才等查海軍衙門奏定章程係專指吉江兩省新添練軍所需軍火而言原未言及江省舊有操防練軍應需洋藥等項既據咨稱津局核裁經費較難接濟外省由津赴領仍需撥還價值查由江赴津往返七千餘里運費既鉅途路尤艱由津由吉均之給價自應援照海軍衙門奏定東三省練軍軍火章程擬由吉林機器局製造領用以節運費而便操防當將黑龍江通省操防應用洋火藥等項自光緒十四年起每年應需洋藥七十五萬四千五百出每出二錢計重九千四百三十一斤零四兩銅帽七十三萬五千三百粒炸藥六百斤開花子一千二百箇門火一千二百枝藥引一千二百箇木信一千二百箇咨明吉林將軍希元



飭局核估製造旋據撥稱每年應需銀四千一百餘兩等因前來奴才等查江省上年所需土藥係由盛京工部領用其價卽由該部經理由京都核銷後因江省添設練軍奏請自造始由練餉內按年彙案報銷至江省洋藥等項歷年均係由津領用卽由局彙銷並無專款現在練餉不敷動支又准部咨分年扣還電桿電纜等款約計練餉內開銷過閏之年已增至三十三萬七千餘兩尙有奏請作正開銷之齊字營解運軍火車價修補旗幟衣等項在外實屬異常拮据此項洋火藥由吉林製造應需銀四千一百餘兩實係無款可籌合無仰懇 天恩准由吉林機器局按年照數製造撥給所需銀兩卽由吉林派員赴部領取年終徑行報銷以昭核實至鉛丸一項仍由京工部請領下部議奏○戊子年嘉樂奏江西外江內湖素稱澤國在南者爲贛河自大庾發源中挾吉袁瑞臨諸流經南昌北達於湖在東南者經建昌撫州爲汝江合金宜泰進諸水亦入於湖而西偏南康六溪十八湖之水匯焉在東爲廣信河東北爲饒州河尋源竟委各達於湖江與湖相表裏故水患常萃於環湖沿江諸郡而內河最下之區山水奔注患亦與江湖相埒各縣多恃圩堤以保田廬惟其中有自行集資辦理者有官爲借款興修者多因地勢衝要民情困苦不能不設法保衛之私暇曲防係佔河灘淌出之地水小則耕種得力水大則田舍可虞夏秋盛漲之時各堤逼束太緊高厚者足以自存卑薄者顯受其禍是堤少無以衛農田堤多轉足激水患

而總由於生齒日繁寸土難捨官既不能禁其與水爭地又何能時時撥款處處修堤助民以與水爭命故素係民修者斷無仰給於官之事自光緒十一年撫臣德馨奏明增糧規復三限所徵二三兩限加增錢文作為堤工經費既可催糧戶早完又可補庫款不逮立法本屬周詳乃民間聞有此款專為堤工之用雖為自修工程亦復觀望不前多方希冀殊不知漕糧加增為杜延欠而設改章以來花戶多於限內完納每年通省所收約計合銀萬兩有奇而江西全省圩堤統計三百五十餘處小堤尚不在內是加徵之數日少請款之堤日多小民惟利是趨反將應修之堤停工待款若不亟定章程勢必多所延誤然將潰決圩堤責令全行自修亦實力有未逮應如何分成津貼以昭平允當經飭司督局妥議詳擬去後茲據署藩司瑞璋督同南昌府知府崔國榜詳稱江西省向係堤岸完固河道深通至道光二十八年大水為災衝決圩堤始蒙借款修築原擬分年徵完咸豐元年欽奉 恩詔詳准豁免嗣因民遭兵燹力難全修各堤日就圯廢同治五年借款興修惟豐城堤工頗為完固同治七年復經奏准臣奏奉 諭旨飭令查明酌修經前撫臣劉坤一委員會縣逐一勘估計有南昌新建進賢星子建昌德化德安鄱陽八縣除瀕河低地萬難施工外應修圩堤七十餘處共估需工料土方銀二十餘萬兩奏明撥案借款興修仍責成各縣及紳士承辦預先撥款派定限次年秋成繳還即以繳還之款輪修別處之堤自南新兩縣辦起遞

各縣計是年共借給銀三萬八千餘兩工程甫竣八年復遭大水又連各外縣共續借銀三萬八千餘兩錢一十一萬六千餘串九年仍復紛紛報決經前撫臣劉坤一責令承督各官賠修紳民儉嗾願自集費修築至十年工竣惟原借之款遞請緩徵而輪修別縣之議亦輟同治十年至十三年間有借款為數尙少光緒二、四、年各借銀七萬四千餘兩八年借銀八萬七千餘兩皆係大水年分光緒十一年又借銀三萬四千餘兩除提撥漕糧加價銀一萬一千餘兩外實動庫款銀三萬二千餘兩統計自同治年間以來均係借給或已辦豁免或現尙欠解光緒八年十一年兩屆均蒙奏准作正開銷此江西歷年借款修堤之大概情形也江西紳民借款修堤銀兩遞年展緩有借無還已成積習然尙知款關國帑非遇重災不敢希冀乃自議復漕糧三限奏明以所收加價錢文提充修堤之用愚民以為設有專款各存倖得之心即水勢平減之年亦復紛紛懇償如南昌之下宮倉圩係久廢之堤新建之汝羅湖係民修之堤從無借款現皆要求無已不知漕糧加價收數無多若動正款補足難乎為繼即民力尙能自修者恐亦因此停止轉滋貽誤流弊無可勝言自應嚴定限制以維全局而杜倖心酌擬四條開列於後一平水年分查係歷來借修要工不在保固年限者統限每年十月開報到司由司委勘屬實應需修費若干即以上年所收漕糧加價酌提一半按其工程大小均攤圩民繳還以免有名無實不敷之數責成圩民富者出

資貧者出力趕修完固請委驗收取其保固限結以備查考一每年所餘一半漕糧加價應請積存道庫  
設過大水決堤工程過鉅再行奏明動用如有不敷奏濟庫款仍照向章分年歸還以示體恤一低窪廢  
圯及向歸民修從無借款案據並設有修堤公項不另籌費各堤概不准其請款以符定章一圩堤保固  
年限內續經坍塌其爲原修草率偷減可知應令承領公款紳民勒限賠修完固以昭儆戒以上四條應  
奏咨立案以便通飭各屬出示曉諭俾垂久遠而資遵守等情前來臣覆加查核水利固應請求庫款亦  
防虛擲且圩長不皆良善往往有刁紳蠹吏錯雜其中侵漁爲事明知經費有常輒思於向不借款之堤  
團圍領漕糧加價紛紛呈訴動以府縣不願勘工司道不肯發款爲詞意存挾制難免不既派民財又冒  
官款致誤賠修貽害實非淺鮮惟有因時制宜釐定章程奏明立案俾鄉曲小民咸知發款歲有常經庫  
項難容濫領庶修築無虞延誤而田廬自可各保矣現該司等所詳各條係爲捍災節用兩有裨益起見  
相應請 旨俯如所請辦理以便通飭曉諭永爲定章得 旨如所請行○庚寅衛榮光奏浙省駐防各  
營需用操防軍火多由機器製造各局自行製造所需料件以銅鉛鋼鐵硝磺煤炭等項爲大宗其餘各  
項難以枚舉均係隨時酌量數目委員前赴上海洋行向外洋訂購陸續運回濟用其關稅一項悉係查  
照光緒九年九月間津海關道詳定各局官運物料俱照修船物料免稅章程請給免單卽予免稅放行

成案隨時由江蘇蘇松太道發給進口免稅單到關驗放應辦在案茲據防軍支應營後局司道詳稱准蘇松太道來移以此後各局過關物料如查無奏准免稅案據停給免稅專單一體照徵關稅一案奉南洋大臣批示上海機器局購運物料係軍需要件既經向免收稅自應仍行照案辦理等因移知查照前來伏查浙省機器製造各局造辦各項軍裝軍火所購銅鉛鋼鐵硝磺煤炭等項物料亦係軍需要件與上海機器局事同一律今上海機器局所購物料既仍照向章免徵關稅浙省自應援照辦理俾無歧異而免過滯詳請奏咨立案等情前來臣覆查無異除咨部查照外理合附片陳明下戶部知之○壬辰以馬盛治爲廣西柳慶鎮總兵○內申以孝行可風予故國子監司業治麟列入國史孝友傳○刑部奏軍機處交出光緒十三年五月初十日面奉諭旨御史慶祥奏民間私藏洋鎗加等治罪並嚴定洋鎗傷人罪各等語著刑部議奏等因欽此○等遵查該御史原奏內稱洋鎗爲害甚於烏鎗烏鎗之例不准民間私藏蓋以近於軍器而又易於傷人若洋鎗則購自外洋尤爲軍中利器其製造纖巧運用便捷有非意料所及卽能傷人者本年四月間西城買兒棚衛有在街用洋鎗轟死高姓一案東城棧竹棚衛有夥盜手持洋鎗轟傷步軍校一案犯均無獲似此傷人案件屢見迭出若非嚴行禁止何以除強暴而安善良請飭下步軍統領順天府五城御史一體出示嚴禁無論大小鋪戶俱不准售賣民間前有私藏者

許令納官免其治罪如再有私賣私藏者一經查獲卽照私藏烏鎗例加等治罪並請 飭下刑部嗣後辦理洋鎗傷人之案已死者照謀殺論已傷者照謀殺人傷而未死論等因奉 諭旨 該部議奏 等查洋鎗來自外洋奸民牟利私販以致民間到處皆有兇徒輒以殺傷人命爲害匪細前於光緒元年據署 盛京將軍崇實奏請嚴定私販洋鎗治罪專條經總理各國事務衙門會同 臣部以內地烏鎗例有私造罪名並無私販烏鎗作何治罪明文有犯向照私造例科斷則私販洋鎗亦應與私造烏鎗例同科酌議嗣後販賣洋鎗照私造烏鎗例枷號兩箇月杖一百每一件加一等罪止杖一百流三千里如有私藏照私藏烏鎗例按件治罪是私販私藏洋鎗罪各定章已極詳明茲據御史奏請嚴禁治罪係爲綏靖 輦轂地方起見應如所奏再行申明定章請 旨飭下步軍統領衙門順天府尹五城御史一體出示嚴禁無論大小鋪戶俱不准售賣洋鎗凡民間私藏者許令納官免其治罪如再有私賣私藏者一經拿獲卽照私造烏鎗及私藏例按件加等治罪如此則根株可期盡絕洋鎗殺人之案自可日見稀少矣至該御史請將洋鎗殺傷人照謀殺已殺已傷擬罪查洋鎗製造纖巧較烏鎗固尤爲便捷而易於殺人則仍與烏鎗相同定例因爭鬪擅將烏鎗竹銃施放殺人者以故殺論擬斬傷人者旗人發甯古塔等處民人發雲貴兩廣煙瘴少輕地方充軍近來洋鎗殺傷人之案均照烏鎗科斷推原例意誠以兇

徒以易於殺人之其爭鬪時輒敢向人施放雖與先期造意謀命不同實與臨時有心欲殺無異故一經殺人卽照故殺擬斬傷人之犯亦分別旗民間擬遣軍較之其餘器械殺傷人及故折人肢體剜睛人眼睛全扶人耳鼻口唇者治罪均嚴辦理已無虞輕縱若如該御史所奏改照謀殺定擬是以臨時爭鬪倉猝殺傷之案牽引陰謀詭計蓄意殺人之條不惟與律意不符且同一火器殺人於鳥鎗之外又分出洋鎗辦理亦涉紛歧至盜賊執持洋鎗搶劫拒捕等案件臣部於本年間業經奏定新章凡強劫及竊盜臨時行強並結夥十人以上搶奪但有一人執持洋鎗者不論曾否傷人不分首從均擬斬立決傷人者加擬斬示結夥三人以上搶奪執持洋鎗之人係首犯亦擬斬梟係從犯擬斬立決傷人者加擬斬示若竊賊施放洋鎗拒捕成傷爲首並幫同放鎗之犯皆擬斬候殺人者俱擬斬立決梟示罪名已較謀殺加重所有該御史請將洋鎗殺傷人照謀殺已殺已傷論之處應毋庸議惟臣等更有請者近來各省糾眾互毆致斃多命及聚眾共毆致死一家三命及三命以上之案爲從下手傷重各犯係屬鳥鎗洋鎗殺人者亦復不少各該省有卽照鳥鎗殺人問擬斬候者亦有仍照下手傷重問擬絞候者雖經臣部隨案更正辦理仍多參差臣等公同酌議應請嗣後糾眾互毆致斃多命及聚眾共毆致死一家三命及三命以上各案內爲從下手傷重至死者如係火器殺人均照故殺律問擬斬候俾示懲儆而昭畫一得 旨如所

議行○譚鍾麟奏洮州土司所屬鐵布各番族與四川松潘所屬大目察上中下撒目各番族連界表延  
千里眾以萬計近來所有番匪出巢劫掠土民牲畜之案屢經批飭洮州土司楊作霖嚴緝未獲一犯臣  
聞楊作霖年少氣盛才足有爲不免妄自尊大時與地方官齟齬前傳其來省面加訓飭曉以利害倘逾  
限仍不獲犯當卽奏請斥革楊作霖惶惑認罪願拿賊自贖嗣經陸續拿獲番匪三名送案追回原贓給  
主認領十二年春間據楊作霖稟稱上鐵布所屬哈扎喬加達剛三族番匪與川番大目察等族匪類勾  
結肆行焚掠並有擄去漢民子女之事派弁往拿兵少則拒捕兵多則竄入川界若不會同搜捕恐致釀  
成大患等情前來臣卽飛咨四川督臣飭松潘鎮總兵派弁酌帶兵丁至交界處會辦九月間臣飭洮岷  
協副將陳元壽帶兵三百餘名駐紮洮州之歸安地方令楊作霖率土兵番兵前往鐵布傳諭夏番各安  
生業曉示哈扎三族縛獻首匪繳呈原贓而該匪等恃險負固抗不遵照楊作霖添調鐵布夏番千名進  
逼賊巢三面圍紮副將陳元壽進駐哇藏寺爲後應十月三十日楊作霖率番進擊攻破喬加達剛二族  
賊巢賊眾逃竄追殺十餘名擒獲哈扎莊首匪撈他一名十一日二十一日又拿獲喬加莊首匪才肉格  
勾二名由陳元壽稟報到臣當經批飭解交洮州廳訊明正法傳首犯事地方懸桿示衆以昭炯戒其竄  
逃川界之匪令川番頭目悉數擒獻旋據鐵布上六族五寺溫布僧總管頭率同哈扎喬加達剛三族各



家屬赴營哀懇就撫經楊作霖散給籽種俾安生業適松潘鎮派漳臘營參將鄧全勝帶兵至鐵布崇路  
地方會同楊作霖勒令大目上下撤路番族將逸匪交出並將掠去漢民黃百笑送交黃張氏領回俾集  
川甘番地頭目百戶等剴切開導各清各族照內地保甲法按戶編審十家一牌設牌頭十牌一甲設甲  
長十甲設一保總須互相清查如有匪類卽行緝獻倘牌甲隱匿分別連坐番族皆欣然遵辦地方一律  
安堵陳元華卽率隊回營漳臘營參將鄧全勝土司楊作霖於二月間各撤兵歸伍據洮岷協副將及岷  
州廳洮州廳轉報前來查洮州所屬鐵布各番與四川番族爲鄰習於强悍搶奪之案固時有此拿  
彼竄往往互相推諉番族恃其險遠竟敢焚掠劫殺肆無忌憚經此次派兵往拿殄其首惡撫綏餘衆兩  
省會同編定保甲邊界分明可得十數年之安足以仰慰 朝廷綏靖邊圉之至意得 旨覽奏均悉卽  
著飭令該土司等將番地保甲事宜認真辦理務令日久相安毋任再滋事端○戊戌諭李秉衡奏惟舉  
府耀州縣賢員請旨嘉勉一摺廣西柳州府知府熊壽山題補梧州府知府陳喜均題補鎮安府知府署  
桂林府知府蔣兆奎署梧州府知府候補知府何耀章候補知府陳如金袁思韜署平樂府知府桂林府  
同知趙慶蕃桂平縣知縣李宗庚署歸順州知州思恩縣知縣沈沂陵川縣知縣補用知縣褚興周署  
馬平縣知縣候補知縣左秉堉宣化縣知縣蕭益章調署貴縣知縣興業縣知縣李昶據李秉衡臚列該

員等才守治績均有可觀實爲該省出色人員深堪嘉許著李秉衡飭令該員等益加策勵勉爲循良毋得始終異轍用副朝廷激勵人才振興吏治至意○己亥岑毓英等奏臣等於光緒十三年五月三十日承准軍機大臣字寄光緒十三年五月初十日奉 上諭中法續訂界務商務條約已令總理各國事務衙門王大臣與法使恭思當畫押所有條約照會各件不日由總理衙門咨行該督撫查照辦理滇省界務周德潤與法使狄隆會勘時意見未合歸入請示者兩段此次定議經總理衙門與周德潤接面商據稱猛梭猛賴一段荒蕪瘠瘠之不足惜岑毓英所見相同至我所必爭者南丹山以北馬白關以南其中山川險峻田疇沃美如能劃歸中國既可固我疆圉亦可兼收地利當經總理各國事務王大臣與法使恭思當反覆辯論將猛梭猛賴一段准歸越界其南丹山以北西至狗頭寨東至清水河一帶地方均歸中國管轄約計收回各地段不下方四百餘里此事煞費唇舌始克就我範圍所有各該處界址應照約接圖由地方官會同駐越之法員申畫清楚設立界牌其餘善後各事宜屯田應如何興辦防兵應如何分戍該督撫務當詳細籌商次第經理界務既定卽須接辦商務岑毓英前奏布置邊防摺內有蒙自爲通商要津之語現准蒙自設立領事開辦通商正相照合至蠻耗係保勝至蒙自水道必由之路准其分設領事屬員與中國分設之稅司互相稽察現經議定蒙自設立領事官時必於數月之前先期照

會以便駐紮關道安設稅司粵省以龍州開關請設太平歸順道一員駐紮該處雲南事同一律著該督撫趁此尚未開辦之時悉心布置奏明辦理至滇之土藥釐金向來徵收甚微現定每百斤稅釐各收銀二十兩必須完過釐銀後方准法商完稅接買將來於課項亦有裨益總之界務商務總理各國事務王大臣所定條約挈其大綱此外節目周詳施行盡利全在該督撫隨時規畫用人得當一切慎之於始免致別生枝節是爲至要將此山五百里各諭令知之欽此仰見 朝廷軫念邊陲 聖謨宏遠欽感莫名並承准總理各國事務衙門將續議條約照會界圖各件咨行到滇等伏查滇省界務自上年正月法人駛至保勝因兵微勢弱屢爲越民所阻延至六月法使狄隆始聞關來至保勝比因越人不靖屢欲延期冀待削平亂黨經臣毓英與內閣學士臣周德潤設法開導加以耆闍之變彼族悚惕始聽校圖定界之議彼時雖幸已集事而淪於越地之猛梭卽豐收堡馬白關外之都竜南丹係雍正年間 恩賜越藩之地此二段猶相持未決幸仰承 聖算經總理衙門王大臣與該國駐京公使仍然校圖畫定俾全案得以結束所有各該處界址將猛梭猛賴一段准歸越南其南丹山以北西至狗頭寨東至清水河一帶均歸中國管轄約計收回各地段不下方四百餘里此次新定各界址應俟駐越法員何時請勘臣等卽當派委委員會同地方官中畫清楚重立界牌其餘善後事宜如屯田戍兵各節查滇越接壤之地雖迤

邇三二千里然皆瘴癘荒遠非兩廣人不能久居臣毓英前曾飭令駐紮河口之調補雲南普洱鎮總兵  
覃修綱督飭所部粵勇於操防之暇擇有可以耕種地面試栽棉花雜糧嗣據該總兵覆稱徧沿邊之  
地俱是山深箐密絕少曠土大凡可以種植之地皆爲土民世業此外實難開墾等語至分戍防兵臣毓  
英前於光緒十一年九月二十二日遵 旨籌議布防邊隘酌移總兵鎮守摺內請以臨元鎮總兵移駐  
蒙自縣開化鎮總兵移駐馬白關以新添臨元鎮前營遊擊常駐蒙自縣以臨元鎮右營都司移駐賓頭  
水田以臨元鎮右營守備移駐蒿枝地以臨元鎮左營都司暨雙水塘同知移駐箇僚廠以開化鎮中營  
遊擊移駐馬白關以開化鎮左營都司移駐交趾城以開化鎮右營都司移駐古林箐並移一守備於長  
嶺岡現據該鎮等稟報所有應行移駐各將領兵丁及各處關隘築立營壩各事均已布置完密惟河口  
與保勝相望中間僅隔小河一道是以另派總兵覃修綱所部粵勇各營駐紮並分駐沿河之南溪漫栽  
南屏各要隘其南溪以上普圖木廠橋頭各處在在皆與越境毗連已派永北營參將李德誠帶兵分紮  
而馬白關外現經改歸中國各地有開化鎮總兵蔡標所部安邊各營粵勇義字各營土勇分屯駐守而  
蠻耗新街石頭汛斗姥閣大石丁等處均係紅江沿岸要口路路可通內地如逢春嶺金子河王布田各  
地皆十洲各猛扼要之區上年已派記名總兵雲南撫標中軍參將岑有富分統戰兵招募土勇節節分

布至通商埠頭臣毓英於上年七月十三日會同內閣學士臣周德潤曾經奏明以龍勝之東紅江南岸越地爲宜適符保勝以上之約今仰蒙 天恩不忍置兩國官商於邊荒瘴癘之地俯順法人之請准於內地蒙自縣開關並於蠻耗分設稅司蒙自駐紮關道惟此次陸路通商凡事均屬創辦伏讀 諭旨令臣等隨時規畫用人得當一切慎之於始免致別生枝節邊防重要敢不欽承查滇省向無交涉事件省中各員亦鮮辦過洋務之人仰懇 天恩俯念邊地需人 敕下總理衙門於向辦洋務堪以專派之員預期開單請 旨簡放來滇補授關道庶幾求才於事前始能收效於日後至滇省漢夷雜處民情素稱頑悍一見洋人入關難免不疑懼生事臣等惟有仰體 聖意督飭地方各官竭力開導使曉然於國家懷遠之仁以副 朝廷綏邊固圉之至意其土藥一項每百斤釐稅各抽銀二十兩應俟開關後即當遵照辦理其餘未盡事宜容臣等隨時規畫會商具奏得 旨該衙門知道○慶裕奏前因奉省各屬州縣倉庫正雜錢糧自上次清查後欸項復形瓜分而應清理以重庫欸當經會同府尹裕長議自同治二年起截至光緒十一年止將各屬倉庫正雜錢糧委員設局澈底清查於十二月初九日開局查辦會將開局日期及委員銜名先後奏奉 諭旨允准在案茲據清查局委員驛巡道興陞等以前奉辦清查遵卽札提各屬州縣查核卷據派撥稽練經書來省飭令局員連日督同按欸勾稽業已略有就緒惟年分

久遠頭目繁雜驟難逐一核算清楚誠以奉省辦理事件向係敷衍塞責並不遵照定章一經清查流弊百出卽如酌提三成米價一款自同治十年間起迄今十餘年僅止奉省酌定價銀並不咨部各屬州縣有照數解省者亦有解不如數及全數未解者辦理既不帶一款目遂多不符又如捕盜營生息錢文一款起自道光二十四年追同治十三年經前任將軍都興阿奏准添兵增餉在於閩粵兩省海關撥款動支令將此項生息錢文存儲不准挪動祇因各城旗民各署向不按年造報致多挪用虧缺無從稽查其有交代案內歷任列抵之款並不報部如錦縣岫巖州交案現皆奉部駁查此外各城抵交結報款無著落者比比皆然必須澈底查清和盤託出方昭核實且查奉省庫無閒款遇有應辦要差以及津貼各衙門不敷辦公用項每於承德縣借用庫款攤諸各屬州縣捐補雖上屆清查不准再有流攤名目第積習相沿舍此別無良策總難禁革在各屬州縣以款係捐攤每多延不解交其實攸關承德縣正款此次清查若不將此項攤款一律清理於庫款仍無實際又奉省准銷兵差銀兩每因本城款不敷領在於外城撥給而外城視為無關痛癢以致抵款延欠甚多竟成紙上空談外此尙多瓜葛之項皆須逐一清理分別抵解清款庶於庫款有裨查辦殊非易事前定一年期限將屆委實趕辦不及現應造各項冊籍繕寫亦需時日斷難依限蒞事應請展限一年俾得認真查辦詳請核奏前來奴才查奉省倉庫正雜錢糧因

上次清查未能核實後滋流弊現在查辦年久款繁諸多瓜葛自應按款旬稽分晰清理查辦殊覺不易  
原定一年限期似形迫促局員等稱因趕辦不及詳請展限自係實情合無仰懇 天恩俯念庫款緊要  
准其展限一年俾得從容查辦事求寬濟免致外錯以昭慎重允之○丁未諭楊昌濬奏開缺知府稟許  
接署人員並抗不交卸一摺據稱福建寧府知府蔣斯岱於奉旨開缺之後具稟侈陳政績並稱夙蒙  
未清請緩至端午節後再行委署又稟許委署該缺之梁玉瑜有挽託司事秦姓許給謝儀求代署篆等  
語特旨開缺送部引見人員既經藩司委員接署應即懍遵交卸何得任意抗延挾私具稟似此冒昧糊  
塗殊出情理之外蔣斯岱著先行革職交楊昌濬督飭兩司將所控情節親提研訊據實參奏以肅官方  
○予福建侯官縣烈婦陳李氏旌表○張曜奏 於六月初一日據濮州知州恩奎等稟報直隸開州境  
內大辛莊黃河漫溢該處與山東連界水勢灌入東境濮州范縣縣張該州縣力顧全堤溜勢不至北移  
遂順南直灌下游穿運而過漫及陽穀東阿平陰堤埝之間幸長清縣有黃堤阻遏經道員張上達督率  
防汛各員竭力搶護一面將五龍潭草壩開通並將東阿民埝挖開十餘丈洩水入河長清以下村莊幸  
免波及大堤亦無疏虞順運北流者東昌府知府程繩武趕將東岸五孔閘開啟放水洩入徒駭由陽穀  
穿運分流一股從汪平通南淹及禹城轄境所有被水村莊現由直隸候補道員金福曾攜帶南省賑捐

銀兩帶同官紳分赴各處逐一散放伏查濮州范縣壽張陽穀等州縣均在北岸處豫省之滑縣直隸之長垣開州下游上年滑縣漫溢開州濮范等處均被淹及去秋卽由直隸督臣李鴻章委派大名府會同河南山東各府州詳加勘辦卽由豫省府縣將滑縣方李集堤段修築完固今年開州境內又復漫溢查上游地方自豫省銅瓦廂以下直隸東防河全力均在南岸上游河面較寬北岸地勢稍高由地方官督飭民間築埝攔水卽山東濮州范縣陽穀壽張四州縣雖築有臨黃長堤一百六十餘里向來亦歸地方官民防守照章加撥經費近年以來因壽張境內連次漫溢臣於去秋派員將臨黃堤工修築以後改派勇夫歸於營縣防守此次盛漲幸免衝溢惟上游堤段防河尤爲緊要臣上年奏論全河情形運河以上黃河一有漫溢水勢肆飈而下其害恐在直隸今下游淤墊日高上游連年漫溢一經漫過全堤而北衝入衛河關係實非淺鮮是上游河南直隸北岸河勢今昔不同急應另籌設防以期穩固 上諭張曜奏直隸開州大辛莊黃河漫溢淹及山東地方並現在籌放賑款情形各摺比歲以來山東地方頻遭水患朝廷軫念災黎迭次賑撫現在復因上游漫溢灌入東境致濮州范縣壽張陽穀東阿平陰禹城等處均被水災暨奏殊深憫惻著加恩將山東本年新漕五萬石同隨漕輕糶銀兩一併截留交該撫督飭印委各員核實散放總期實惠均沾勿稍弊混至此次開州漫水尙未據李鴻章奏報著該督嚴飭地方文武



將堤工加意培護實力防守勿得再有疎虞並將現辦情形迅速核奏○戊申張之洞等奏上年具奏籌議廣西邊隘分營扼紮請撥餉酌核督駐所添鎮道以資分任各節奉 旨該衙門議奏等因欽此旋經兵部會同吏部戶部議奏欽奉 諭旨刷印原奏咨行到粵當經轉飭議覆去後茲據署廣西布政使凌彥銘署按察使周鶴會同督後局司道籌議詳覆並准廣西提督臣蘇元春咨轉據該營將守備等節次稟覆該提督逐加考核先後造具清冊呈送前來由臣秉衡與臣元春商定具稿咨送臣之洞核辦查原咨詳內稱柳州府提標額設制兵六營一千二百六十名除分防外存城八百餘名現在中營移駐龍州擬裁去前後兩營所留左右城守三營僅留五百十六名若照原撥汛防之永福雒容象州柳城馬平等州縣屬境二十一處則存城兵額較少不敷操防擬將中爐所管之永福縣城守深定黃泥寨沙鹿寨五汛改歸桂林營就近分防前後兩營所管之雒容縣城守中渡洛垢高嶺象州城中大東馬平縣穿山等七汛左右兩營所管之馬平縣振柳白沙三都雞公五都流山柳城縣城守太平等八汛改歸柳慶鎮左右兩營及柳州城守營分別派防其各汛在郡城之左者撥歸左營在郡城之右者撥歸右營其土博魚窩下古三汛前因匪徒滋事於光緒三年添設現在地方安靜應即裁汰歸入五都汛以省繁冗又中路之振柳白沙山三汛附近城南應歸城守營就近管理計各汛派出兵一百七十五名存城尚有四

百一十一名擬於裁汰前後兩營內挑留十四名合成六百名仍分六戰四守每百名內設馬兵六名以符舊制其鎮標左營兼管中軍差務較緊擬撥二百五十名右營擬撥二百名其餘一百五十名歸入城守營所有存留各兵應在五營內一併挑選務期精壯足額毋任疲冗充數餘者卽作爲前後兩營悉予裁汰惟左營游擊所轄原有守備千把各員今既兼管中軍較之左營尙少千總一員自應一併添設又柳州城守營都司所轄原有千把額外六員向無防汛今既派有分防不敷差委應添設外委一員額外二員卽在前後兩營員弁內酌撥其永寧州守備一營原歸提標中營應改隸鎮標左營管轄至龍州城守營游擊所有原防苛利汛水口關二處悉仍其舊應設守備一員千總一員把總二員外委二員額外二員卽在原營員弁內挑補並添設下凍土州防汛以臻周密又新太協右營應行裁撤所有該營守備原駐之明江驛及各弁分防之寧明海淵思陵等汛應由道縣營弁兵接替撥提標中營弁兵填防平而關鎮南關由隘三處以補能應道縣兩營所遺之額其餘該兩營及左營原防各汛悉仍其舊又上思營都司向隸左江鎮管轄亦係責任邊防原奏未經議及茲應將該營都司改爲專屬提標以歸畫一此外尙有平樂協副將全州營參將賓州營參將桂林營游擊四協營向歸提標管轄應照原制毋庸更改除新設龍州城守營中軍守備原係內地部選之缺今移駐龍州煙瘴地方亦應改爲煙瘴題調要缺其餘

改撥各缺均應仍照舊制辦理其建造移設提督道員以下文武各衙署應由西省籌撥經費另行奏咨辦理此遵照部議查明移改營制並續擬分撥之詳晰情形也所擬新設太平歸順兵備道一員控制邊關經理中外交涉諸務貴重事繁非精明幹練熟悉兵事邊情之員弗克勝任擬請作為衝繁難邊要兼煙瘴題請要缺酌照廣東雷瓊道直隸津海關道湖北漢黃德道之例由外酌量奏請升調揀補歸順州知州缺原係繁難兼煙瘴題請要缺今升為直隸州管轄鎮邊一縣擬請仍作繁難煙瘴要缺由外揀員調補五年俸滿在任候升小鎮安通判一缺原係煙瘴要缺今改為鎮邊縣屬於歸順直隸州擬請作為繁難煙瘴要缺由外揀員調補三年俸滿在任候升並添設道庫大使一員鎮邊縣典史一員擬均作為煙瘴調缺三年俸滿在任候升其餘上思鬱林等州僅係撥隸別無更張其缺分自應照舊並援案擬給該道員及道庫大使鎮邊縣知縣典史各員廉俸役食銀兩暨添移裁改各營之俸餉等項銀兩分別核明造冊備查其餘未經添改各營毋庸備造以省繁牘此遵照部議體察地方情形酌定逐項缺分之詳晰情形也至小鎮安通判改為鎮邊縣該處應試童生向入鎮安府學者今為歸順直隸州屬縣自應另設學額擬請歲科每試取進四名廩生一名增生一名四年一貢武童歲試取進四名該州縣均係科歲併行即令就近附在鎮安府城考棚校閱並擬援照崇善凌雲天保等縣併歸太平泗城鎮安等府學兼

管成例將鎮邊縣生童由歸順直隸州學正兼管毋庸另設該縣訓導以節糜費又上思州改歸太平府轄向之赴試南甯者自當改赴太平惟太平考棚狹窄未能容納多人應令上思生童仍赴南甯考試俟該處籌款另建寬展考棚後再行飭赴太平考試此又改設縣治另定學額就近赴考兼管之詳晰情形也所有新設之柳慶鎮總兵一缺應請 旨迅賜簡放其新設之太平歸順道一缺俟部議核定缺項後卽當由廣西撫臣會同督臣酌量揀員分別升調請補以便舉辦一切事宜所有鎮道暨此外添設各缺均請 敕部頒發關防印記以資信守其餘未盡事宜應俟該鎮道等到任察看情形陸續詳請奏辦至廣西協餉解未足額臣之洞已飭廣東藩司陸續竭力籌解其各省欠解數目業於上年十一月會同奏明應請 飭部查照前奏指撥的餉以濟要需得 旨該部速議具奏○己酉諭前據御史瑞良奏八旗兵餉搭放二成錢折銀兩久未開放請旨飭查一摺當經諭令八旗都統查明具奏茲據奏稱八旗兵丁領餉向須扣除庫利銀數該御史未知戶部定章以致所除餉銀數目未符至扣銀六分折改當十錢一千僅於光緒十一年間查明戶部來文放過三箇月與二成搭放之錢毫不相涉參領等官領放餉銀均各按月出示曉諭二成錢折銀兩照常開放並無剋扣朦混之弊等語八旗放餉情形既據各該都統確切查明毫無弊混該御史所奏均毋庸議○庚戌總理各國事務衙門引見考取出洋游歷司員李

秉瑞等十二人○甲寅蘇元春等奏上年二月督臣張之洞會同臣等具奏遵旨籌辦廣西邊隘分管扼紮諸撥的餉摺內聲明越境游眾蔓延全邊未靖又值勘界未定未便示人以弱勢難多議裁減自是年正月起認真汰留裁去八營併爲二十四營俟冬間界務大定再當裁去四營以節餉需等情嗣准兵部咨行會議具奏光緒十二年八月十六日奉旨依議欽此欽遵在案惟時越南游眾蟻聚練山宣光等處轄境比經臣秉衡籌議定章分別辦理資遣報報陸續來歸者計有五千數百名之多其餘散處四方尙復不少自冬徂春界務未定該眾出沒靡常輒與法越官民尋仇爭鬪臣元春督飭各軍將領各就防所嚴爲之備勿任近邊因邊防尙未稍鬆餉需雖藉分支絀猶未便遽議裁營本年四月以後屢接東興電報界事不久可以由內定約臣等往返函商宜及此時裁撤四營用符原奏查新授廣東南韶連鎮總兵方友升前經奏准 陛見自應遵旨入都貴州安義鎮總兵蔣宗漢奉旨毋庸來見亦應飭赴本任該兩員原帶四營一併裁撤另調他營分頭戡紮平而關及隨順州鎮安縣屬沿邊各要隘此時邊防仍留二十營臣等整軍籌餉各有專責惟當合力圖維悉心措置以期仰副 聖主綏靖邊疆之至意下部知之